



廣州府志

ル 5
1212
2



門ル5
1212
巻2

廣州府志卷三

訓典三

乾隆元年

上諭總理事務王大臣廣東山海奧區貧民多以捕魚爲業各縣俱有額徵漁課爲數無多相沿已久後因歸善縣不肖知縣私取陋規加于額徵十數倍遂經撫臣定議加增魚稅一千餘兩作爲贏餘而海豐惠來潮陽三縣地方仿照加增海豐縣則增至四千餘兩惠來縣增至五百兩潮陽縣增至七百餘兩朕思粵東山多田少小民生計艱辛故以捕魚爲養贍之計今他縣漁租皆仍舊額而歸善等四縣獨徵收加重恐漁民輸納維艱非國家愛養黎元之意著將四縣加增之數悉予豁免仍照原額徵收其捕魚小船尤不應在輸稅



之內再查粵東有埠租一項亦民間自收之微利前經地方官通查歸公爲湊修圍基之費夫圍基旣動公項銀兩修築則埠租一項亦著一體免徵以免閭閻之煩擾該督撫轉飭有司實力奉行毋使奸胥地棍借端私取致窮民不得均霑實惠

乾隆元年

上諭總理事務王大臣朕聞廣東有屯糧羨餘一項原係衛所官弁徵收每正糧一石收穀三四石不等除正米撥支兵糧外餘穀悉係衛所官弁侵蝕入己嗣經督撫查出題報歸公留備賑糶之用但屯田糧額本重於民田今以一石之糧徵收至三四石屯民其何以堪又聞各省軍田糧額較之民地亦重從前軍田畝數原多嗣後漸次清釐田主亦屢經更

易而糧石仍輸舊額自屬苦累大學士等可寄信各督撫詳加確查將如何定額徵收並革除額外加徵之處密議請旨

乾隆三年

上諭每科主考差往各省彼地督撫有無餽送路費向無定例今朕酌量道途之遠近分別路費之多寡雲南八百兩貴州七百兩四川廣東廣西福建湖南六百兩江西南江浙江湖北陝西五百兩河南山東山西四百兩爾等可行知各督撫遵照此數不得以私意增減主考等亦不得於此數之外更有所受將此永著爲例

乾隆五年

上諭東南沿海一帶如山東浙江福建廣東廣西江南等省俱設有戰船以爲海防之備今承平日久官弁漸覺疎忽朕

聞船隻數目竟有報部之虛名而十分之中不無缺少二三
者至于大修小修之時每因船數太多難以查核該防營弁
及州縣官員通同作弊將所領帑銀侵蝕入己報修十隻其
實不過七八隻而又塗飾顏色以爲美觀仍不堅固且更有
不肖官弁令子弟親屬載販外省或賃與商人前往安南日
本貿易取利者以朕所聞如此雖未必各省皆然亦難保
必無其事可傳諭該省督撫提鎮等嗣後嚴行稽查加意整
頓務令諸弊盡絕以重海防倘將來再有風聞經朕特遣大
臣前往查出則虛冒廢弛之咎惟於該管之大臣是問

乾隆七年

上諭軍機大臣等廣東廣肇圍基向來原係民修相安無事
後經鄂彌達奏請改爲官修百姓遂以爲無與己事一切委
之於官歲歲多有衝決民既置之不問官豈能曲爲隄防今
辦理數年總未妥協仍不免疎虞將官員徒受參處而百姓
愈長刁頑爲籌久遠終非長策可寄信與慶復令其詳審本
地情形若可仍改民修卽將所見具摺陳奏

乾隆十年

上諭國家設制科取士首重者在四書文蓋以六經精微盡
于四子書設非讀書窮理篤志潛心而欲握管揮毫發先聖
之義蘊不大相逕庭耶我

皇考有清真雅正之訓朕題貢院詩云言孔孟言大是難乃
古今之通論非一人之臆說也近今士子或故爲艱深語或
矜爲俳儷辭爭長角勝風檐鎖院中偶有得售彼此仿倣爲
奪幟爭標良技不知文風日下文品益卑有關國家掄才鉅

典非細故也夫古人論文以渾金璞玉不雕不琢爲比未有穿鑿支離可以傳世行遠者至於詩賦採藻敷華雖不免組織渲染然亦必有真氣貫乎其中乃爲佳作今于四書文採掇辭華以示淹博不啻于孔孟立言本意相去萬里矣先正具在罔識遵從習俗難化職此之由嗣自今其令各省督學諸臣時時訓飭鄉會考官加意區擇凡有乖于先輩大家理法者擯棄勿錄則詭遇之習可息士風還淳朕有厚望焉

乾隆十年

上諭三載賓興國家舉賢右文之大典必諸弊悉去然後可以拔真才所謂稂莠不除則嘉禾不生其理顯然向來察弊之法不得不嚴者正慎重科名厚待良士之道昨歲朕親臨貢院遍觀堂所周覽號舍矮屋風檐備極辛苦深可軫念比賦四詩命刻堂壁可以知朕心矣今歲會試已展期三月以待春溫嗣後卽以爲例茲特豫降明旨諭禮臣知貢舉俾得先期計議從容料理當嚴則嚴當寬則寬于剔除弊端之中寓優卹士子之意知貢舉者其善爲之

乾隆十一年

上諭內閣據廣東巡撫準泰奏報廣州府之南海三水順德等縣因大雨水發有被衝田畝圍基房舍之處民間有傾壓淹斃者定例夏災止有借貸口糧籽種未及賑恤之條等語朕心深爲軫念著將實在乏食貧民給與一月口糧所有沙壓田畝倒塌房屋及淹斃人口令該撫查明俱著加恩分別撫恤其被災稍輕應須借給口糧籽種者卽行借給秋後免息還倉俾被水民人均霑實惠無致失所

乾隆十二年

上諭國家敬

天尊

祖禮備樂和品物具陳告豐告潔所以將誠敬昭典則也考之前古籩豆簠簋諸祭器或用金玉以示貴重或用陶匏以崇質素各有精義存乎其間歷代相承去古寢遠至明洪武時更定舊章祭品祭器悉遵古式而祭器以資代之惟存其名我朝

壇

廟陳設祭品器亦用瓷蓋沿前明之舊

皇考世宗憲皇帝時考按經典範銅為器頒之闕里俾為世守曾宣示廷臣穆然見古先遺則朕思

壇

廟祭品既遵用古名則祭器亦應悉用古制以備隆儀著大學士會同該部稽覈經圖審其名物度數制作款式折衷至當詳議繪圖以聞朕將親為審定勅所司敬謹制造用光禋祀稱朕意焉

乾隆十六年

上諭向例直省知縣三年行取一次吏部按期奏請康熙雍正年間此舉多停當朕臨御之初臣工中有撥行取成規入告者朕以舊制可循勅部議覆旋經準行由今觀之此特相仍故套而于吏部人材毫無裨益所當永行停止特諭

乾隆二十二年

上諭各省教職六年俸滿例由該督撫學政公同甄別前經

降旨令將堪膺民社者保題其年力未衰可以留任者一併出具考語送部引見但教職一官寒糴可念遠道孤征舟車僕從之資不無多費僻在邊省者轉瞬六年尤爲僕僕嗣後各省甄別教職雲貴川廣福建湖南甘肅等省俱著改爲八年舉行一次俾得寬其程限至來京時亦不必專檄獨行聽從便結侶請咨送部引見其六年保題縣令及餘近省分仍著照舊例

乾隆二十七年

上諭內閣各省督撫提鎮職任封疆藩臬二司爲通省錢穀刑名總滙員缺緊要遇有丁憂事故向俱專差奏報其在近京各省尙不至稽遲若邊遠省分長途齎奏往返需時嗣後雲南貴州四川廣東廣西福建甘肅湖南等省督撫提鎮藩臬等大員遇有丁憂事故著由驛限日行四百里馳奏以便另行簡放庶要缺不致久懸于邊省地方營伍事務均有裨益

乾隆二十九年

上諭內閣據蘇昌等奏韶州府等屬先後間有被水之處惟英德縣地方兩次被淹情形較重現在照例撫恤等語該處城鄉被水雖屬一隅偏災但兩經山水漲漫田廬多有淹損無力貧民口食維艱著加恩將英德縣酌賑一月口糧俾資糊口其南海三水清遠等縣民修圍基當被水之後復令裹糧趨事亦未免拮据著加恩各按在工民夫酌給口糧以資力役該督撫等其董飭所屬實心經理以副朕加惠貧黎至意

乾隆三十一年

上諭內閣據王檢奏粵東隨祠嘗租每滋械鬪頂兇之弊請散其田產以禁刁風等語其意特爲懲兇息訟起見但欲豫防積弊遽將通省鄉祠田產紛紛查辦恐有司奉行不善吏胥等或致借端滋事而族戶人等賢否不齊亦難免侵漁爭攘之弊徒多擾累況建祠置產以供祭祀贍族之資果能安分敦睦如宋臣范仲淹義田之制閱今已歷數百年其遺規何嘗不善若倚恃族蕃貲厚欺壓鄉民甚至聚眾械鬪牟利頂兇染成惡俗其漸自不可長此等刁風閩廣兩省爲尤甚邇年來遇有械鬪傷人之案皆究明兇手盡數抵償入于情實不與尋常鬪殺同科至買兇頂兇之犯亦令部臣嚴定條例盡法懲治雖較前稍知斂戢而澆悍之俗尙未能盡除嗣

後令該督撫嚴飭地方官實力查察如有此等自恃祠產豐厚以致糾合族眾械鬪斃命及給產頂兇之事除將本犯按律嚴懲外照該撫所請將祠內所有之田產查明分給一族之人俾兇徒知所警懼而守分之善良仍得保有世業以贍族人於風俗人心較有裨益不動聲色爲之以徐著將此通諭各省督撫飭屬一體留心妥辦

乾隆三十五年

上諭軍機大臣等據李侍堯奏查覈各營軍械一摺所辦甚是軍器爲營伍要需自宜銳利堅精以期適用若刀刃無鋼鎗桿輕脆止顧飾觀而不求實濟實爲綠營陋習該督令其改毀另製驗明分給實于武備有裨至盈餘軍裝一項尤爲有名無實舊例相沿本屬未協各督撫如果留心講求軍實

止須于查閱營伍時實力點驗按其成造年歲遠近或換或修常令堅完無缺何必額外盈餘致令庫貯陳因歷久銹蝕消歸無用既屬耗費可惜且啟不肖營員移舊作新浮銷侵冒更滋流弊今該督逐一查驗將冗設朽壞之內分別銷毀變價自屬覈實辦公但粵東西兩省既該如此恐各省營中軍器亦復相同著傳諭各督撫均仿照李侍堯所辦實心經理隨時覈辦毋以具文塞責致干咎戾

乾隆三十六年

上諭內閣前此普免天下錢糧曾將廣東省廣韶等府州屬應徵官租及屯田曠軍餘羨等項銀錢米石及應徵學租銀兩蠲免十分之一今普免直省正供辛卯年屆該省輪免之期著加恩仍照上次將應徵官租等項蠲免十分之一俾邊

海農民均霑愷澤

乾隆四十五年

上諭內閣大學士公阿桂覈奏各省武職名糧裁添養廉挑補實額一摺據稱國家經費驟加不覺其多歲支則難為繼此項經費歲增至三百萬統計二十餘年即須用七千萬兩請將武職議給養廉折扣兵餉除滇黔四川閩廣等省控制邊疆應查明增添兵額又陝甘兩省業添滿漢兵一萬五千餘名外其餘腹裏省分均可無庸挑補實額并請交軍機大臣會同該部查議等語國家經費原當量入為出而足兵衛民為萬年久遠計者又不得稍存靳惜之見阿桂現管三庫其所奏康熙雍正年間出入大數通盤畫算大臣籌國自應如此但朕以泉貨本流通之物財散民聚聖訓甚明與其聚

之于上毋甯散之于下且在官多一分卽在民少一分顯而易見朕卽位初年戶部庫銀計不過三千萬兩今四十餘年以仰荷

上蒼嘉祐年穀順成財賦充足中間普免天下地丁錢糧三次蠲免天下漕糧兩次又各省偏災賑濟及新疆兩金川軍需所費何啻萬萬而賦稅並未加增又非如漢武帝之用桑宏羊唐德宗之用裴延齡以培克爲事而致府藏充盈也現在戶部庫銀尙存七千餘萬兩朕又何肯稍爲靳惜乎且卽以歲支頓增三百萬兩計之至乾隆六十年歸政之時所用亦不過四千餘萬加以每年歲入所存其時庫藏較卽位時自必尙有盈餘又何必于此事鯁鯁過計乎從前海望在戶部時不肯明言銀庫實數其意似恐外人聞知朕彼時卽不

以爲是國家惟正之供出入歲有常經原屬大公至正又何必掩人耳目乎甚如明季金花聚斂乃至戶部請內帑亦不肯發則其鄙悖更可笑矣卽以內帑而論憶乾隆初年內務府大臣尙有奏撥部庫銀兩備用之事今則裁減浮費釐剔積弊不特無須奏撥且每歲將內務府庫銀命撥歸戶部者動以百萬計又何必以經費不敷歲出爲慮乎至於歲入項下惟米豆關稅一節初年曾經免稅原欲使市價日平乃行之日久并未平減殊不滿朕意後因安甯奏請復收經部議准允行至遇地方歉收穀貴之年原有降旨特行免米豆所過關之稅所以隨時調劑或商賈多往亦救災區米貴之一法耳今阿桂旣籌畫及此但朕意究以多添兵力不惜經費爲是在廷諸臣自必各有確見所有阿桂原摺并朕此旨一

併發鈔使中外咸知朕意并著大學士九卿科道詳悉妥議具奏

乾隆四十八年

上諭軍機大臣等據尙安奏廣東外委一項向例陸路食馬糧一分步糧一分水師食步糧二分今全行裁扣每年賞給銀十八兩作為養廉未免稍形拮据從前造報時未將實在情形詳晰聲敘殊屬疎忽請將陸路外委原食馬糧一分水師外委原食步糧一分仍准支食停其拔補新兵等語此等額設外委于拔補後與千把等一律辦公乃千把總等自議裁名糧之後尙有賞給養廉及支食俸薪馬乾等項而外委所得分例較之馬步兵支食糧餉轉少未免偏枯但各省俱有外委從前戶兵兩部定議時自然畫一辦理至所稱廣東省未將實在情形聲敘之處究係如何疎漏至該省所得分例不同著戶兵二部堂官詳查覆奏再尙安此奏將來若何另議俾該弁等得以從容辦公不形竭蹶之處并著傳該堂官詳悉妥議具奏

乾隆五十四年

上諭軍機大臣等據福康安奏查禁私販紅鹽一摺內稱粵東煎曬鹽觔出於場而散於埠緣商人等力疲課絀不能及時收買各場丁又因一時不能速售勢必減價售私以致奸販乘機囤積現在改帑歸綱商民等捐輸鹽本當飭動撥綱本銀一十萬兩令局商赴場趕緊買運并于鹽觔出場之後仍嚴禁夾帶查緝透漏場鹽不致壅滯則私販自無從囤積等語各省官引暢銷私販裏足全在地方文武各官不時嚴

緝則奸商自無由乘機出沒所謂有治人無治法也至該督所稱粵省現在改帑歸綱商民等捐輸鹽本業已完交銀一百餘萬兩實貯在庫當先撥綱本銀十萬兩令局商赴場趕緊買運等語與其動撥十萬兩收買有限何不將場內煎曬之鹽儘數收買則私販無從得鹽而場丁等減價私售之弊亦可永除現在改帑歸綱存庫之銀既已有百餘萬兩之多則高州府屬出鹽最旺之電茂博茂等場自應儘數收買于該省鹺務更爲有裨至湖南衡州府例食淮鹽非如楚之桂陽臨武藍山宜章等八州縣本係行銷粵鹽可比因衡州與粵省全州接壤是以私販易于充斥著傳諭福康安嚴飭所屬于水陸鹽餉經由處所及沿海一帶并于楚省接壤之區一體實力緝私毋使奸徒乘機興販俾粵鹽不致充賺淮綱

以期疏引遏私方爲妥善

乾隆六十年

上諭軍機大臣等朱珪奏廣東省五十九年分綠營倒馬成數并買補節省銀兩一摺各省馬匹例應題報朋馬奏銷時將倒馬成數并節省買補銀數覈明具奏此非爲節省起見馬匹爲戎政所關兵丁等或餽養不善致多倒斃殊非慎重武備之道且馬亦生命定例覈明倒馬成數本意欲令兵丁知善養馬重馬政亦所以飭戎行并非沾沾節省糜費已也著傳諭各省督撫通飭綠營將弁曉諭各兵丁等務將馬匹小心餽養俾收實效不得僅以循例具奏了事

嘉慶元年

皇帝欽奉

太上皇帝詔曰朕纘紹丕基撫綏函夏勤求治理日有孜孜仰賴

上天眷佑

列聖貽謀寰宇乂安蒸黎康阜聲教四訖中外一家御極以來平定伊犁回部大小金川擴土開疆數萬餘里緬甸安南廓爾喀以及外藩屬國咸震攝威稜恪修職貢其自作不靖者悉就殄除功邁十全恩覃六合普免各省漕糧者三地丁錢糧者四展義巡方行慶施惠蠲逋賑貸不下數千萬億振興士類整飭官常嘉與萬邦黎獻海隅蒼生同享太平躋之仁壽朕持盈保泰弗懈益虔勤念雨暘周諮稼穡於庶言庶獄庶慎靡不躬親宥密單心時幾交敕用疊上副祖宗付畀之重下撫億兆仰戴之誠日慎一日六十年於茲

矣迴憶踐阼初元曾默顯

上蒼若紀年週甲當傳位嗣子不敢仰希

皇祖以次增載今敬迓

洪釐幸符初願朕康強逢吉九旬望表五代同堂積慶延祺光於往牒非

昊慈篤祐申命用庥曷克臻此

天生民而立之君使爲司牧授受之際敢不兢兢溯自癸巳南郊卽以嗣位皇子之名默奏

上帝竝於盛京恭謁

祖陵敬告

列祖在天之鑒昨冬頒朔屆期特宣布詔旨明定儲位以丙辰爲嘉慶元年預勅所司敬議歸政典禮皇太子秉性謙沖

臚誠固讓率同內外王公大臣等具章呈朕至百歲始行斯典但

天聽惟聰朕志先定再四申諭勿得懇辭皇太子仁孝端醇克肩重器宗祏有託朕用嘉焉已諏吉祇告

地天

宗廟

社稷皇太子於丙辰正月上日即皇帝位朕親御太和殿躬授寶璽可稱朕為太上皇帝其尊號繁文朕所弗取毋庸奏上凡軍國重務用人行政大端朕未至倦勤不敢自逸部院衙門及各省題奏事件悉遵前自行履端首祚禪授上儀宜沛新綸同敷愷澤所有合行事宜條列於左

一在京在外諸王以下至公等以上俱加恩賜

一內外自公主以下至格格各加恩賜

一內外滿漢文武大小官員俱加一級

一內外大小各官除各以現在品級已得封贈外凡陞級及改任者著照新銜封贈

一文官在京四品以上在外三品以上武官在京在外

二品以上照現任品級各蔭一子入監讀書

一內外文職自四品以下武職自三品以下降革留任及住俸罰俸處分准其開復

一會試額數俟禮部臨期奏明人數請旨酌量廣額鄉試大省加三十名次省加二十名小省加十名滿洲

蒙古加六名漢軍加三名

一各直省入學額數大學加七名中學加五名小學加三名

一國子監貢監生及各官學教習免坐監一月

一各直省儒學無論府州縣衛俱于本年以正貢作恩貢次貢作歲貢

一每府州縣衛各舉孝廉方正暫賜以六品頂帶榮身以備詔用務期採訪真確毋得濫舉

歷代帝王陵寢

孔子闕里及五嶽四瀆等祀應遣官致祭者照舊例舉行

一官吏兵民人等有犯除謀反叛逆子孫謀殺祖父母父母內亂妻妾殺夫奴僕殺家長一家非死罪三人

採生折割人謀殺故殺真正人命蠱毒魘魅毒藥殺人強盜妖言十惡等真正死罪不赦外軍機獲罪隱匿逃人亦不赦外其餘自嘉慶元年正月初一日以前已發覺未發覺已結未結者咸赦除之有以赦前事告訐者以其罪罪之

一各省軍流人犯查明到配三年實在安靖守法及年逾七十者釋放回籍

一各旗籍內務府並五旗包衣人等凡侵貪挪移一切賠罰應追銀兩實係本人家產盡絕者查明准與豁免其分賠代賠以及牽連著賠者一概豁免

一凡官員因公賠罰等項而其子孫又代祖父著賠者查明寬免

一旗營官兵有因出征及被災借支俸餉者免其扣還
一滿漢兵丁曾經効力行間因被傷年老閑住者除例
得優卹外查明酌加恩賚

一各直省有同堂五世及親見七代者除例賞匾額外
查明各加恩賚

一除五旗包衣佐領下披甲人等不賞外八旗滿洲蒙
古漢軍護軍披甲人炮手步軍各賞一月錢糧

一天下之本農為重各府州縣衛果有勤於耕種務本
力作者地方官不時加獎以示鼓勵

一年老之人自古所重滿漢七十以上除家奴外給與
品級之處該部查議具奏

一軍民年七十以上者許一丁侍養免其雜派差役八

十以上者給與絹一疋綿一觔米一石肉十觔九十
以上者倍之

一各處養濟院所有鰥寡孤獨及殘疾無告之人有司
留心以時養贍毋致失所

於戲常厥德保厥位深維
創業垂統之心本諸身徵諸民聿昭繼體守文之治欽此予

小子祇承

慈命勉荷洪圖謹奉宣

敕旨布告天下咸使聞知

嘉慶四年

上諭現屆長至

圍丘大祀

高宗純皇帝

升配禮成後自應仰推

皇考恩慈用敷惠閭因思乾隆六十年以前各省積欠緩徵地丁耗羨及民欠籽種口糧漕糧銀兩并積欠緩徵民借米穀草束等項現在應徵者尙復不少著該部通行各省詳悉查明將以上各款自乾隆六十年以前普行豁免俾寰宇羣黎同霑

遺澤于乾隆年間逋欠銀米等項永免追呼用仰副

皇考六十年來子惠元元至意即將此二條入于

升配恩詔款內欽此

嘉慶十四年

皇帝詔曰朕纘承

洪緒臨御寰區思以藐躬託于兆民之上所願萬方臣庶同臻康樂和親是以夙夜寅畏不敢暇逸以勤求郅治今茲春秋方屆五旬秉誠執競惟日孜孜曷敢稍存滿假鋪飾鴻庥惟念朕繼統膺圖仰荷

上蒼眷命

列聖垂恩虔鞏亶祐實有度越恆常者溯自乾隆三十八年皇考高宗純皇帝精心付託卽以朕名默告

昊穹嗣

詣盛京恭謁

三陵復

親率朕躬面稽

列祖維時雖未明示建儲而大統攸屬沖漠之中篤承

佑相者已二十餘年至丙辰大廷授璽恪奉

訓政三年尤為千古未有之隆遇時值承平日久根莠孽牙適有三省教匪不靖朕日稟

睿謨授師籌筆知所式循洎親政以後陳律旌庸遂獲翦艾渠魁蕩除羣醜今億姓樂業庶事咸熙更幸四序均調雨暘

時若三靈協祉水土平成朕恭受蕃釐履盈思懼屬者內外臣工效祝輸忱一切繁文縟節概

從屏祛惟允懷古訓天子代天養萬民若以予一人擊執撝抑使德不下究海內希恩倖

澤之志鬱而弗宣朕心歉焉爰祇循茂典俯順輿情舉可嘉惠臣民者布令推恩靡有靳惜前已

降旨特開恩榜烝我髦士茲履端肇慶載頒綸綍俾中外遠邇咸霑渥溥迓祥和朕用是以仰答

天恩覃敷考澤廣深仁壽斯民之意所有應行事宜開列于後

一五嶽四瀆等祀應遣官致祭著察例舉行

一 歷代帝王陵寢

先師孔子闕里應遣官致祭著察例舉行

一自王以下宗室覺羅十五歲以上著俱加恩賜

一滿漢大臣年六十以上者俱加恩賜

一內外滿漢文武各官俱加一級

一內外大小各官除各以現在品級已得封贈外凡陞

級及改任著照新銜封贈

一國子監貢監生及各官學教習免坐監期一月

一各省儒學以正貢作恩貢以次貢作歲貢

一滿漢孝子順孫義夫節婦該管官細加諮訪確具事實奏交禮部核實旌表

一八旗滿洲蒙古漢軍兵丁及內札薩克喀爾喀等蒙古年七十八九十以上者分別賞賚至百歲者題明旌表

一軍民年七十以上者許一丁侍養免其雜派差役八十以上者給與絹一疋綿一觔米一石肉十觔九十以上倍之至百歲者題明旌表

一直省有坍沒田地其虛糧仍相沿追納者該地方官

查明咨部奏請豁免

一從前各省偏災地方所有借給貧民籽種口糧牛具等項查明實係力不能完者著予豁免

一各處養濟院所有鰥寡孤獨及殘疾無告之人有司留心以時養贍毋致失所

一各省軍流以下人犯俱著減等發落

一各省監禁人犯著將上年秋朝審緩決至三次各犯仍照節次查辦之例查明所犯情節分別減等發落其緩決一二次人犯內有案情本輕可與矜原者亦著該部查明請旨定奪

於戲惟一人受茲多福用敷錫厥庶民俾萬姓懷于有仁肆對揚我光命布告天下咸使聞知

嘉慶二十三年

上諭朕自丙辰元旦仰蒙

皇考高宗純皇帝大廷

授璽寅紹

丕基兢兢業業旰食宵衣以勤求到治所願者四海羣黎家給人足同臻康樂敬惟

皇考臨御六十年普免天下錢糧四次漕糧三次

湛恩汪濊淪浹民心朕嗣位以來亦思廣施閭惠大賚寰區始緣教匪不靖軍興孔棘繼以黃河泛溢屢舉大工十餘年間所費帑金數踰十千萬國家財賦歲有常經實有人不敷出之勢是以嘉慶十四年朕五旬正慶雖恩綸載錫而未能普惠閭閻比年仰荷

皇蒼垂祐稂莠蕩除萬方甯謐河流順軌久慶安瀾以正供所入謹制國用尙可無虞匱乏朕子惠元元深念損上益下之義俟將來府藏充盈仍欲覃敷渥澤明歲嘉慶二十四年爲朕六旬正壽宜先蠲除積逋俾小民戶免追呼共享含哺之樂所有節年正耗民欠及因災緩征帶征銀穀著該各督撫詳晰查明按照該省所屬之某州某縣實欠在民銀穀若干速行開單具奏以次降旨豁免並著先將此旨謄黃宣示城鄉村鎮咸使聞知使官吏胥役無從影射侵欺以期膏澤下究用副朕惠鮮懷保仁壽斯民至意

嘉慶二十四年

皇帝詔曰朕寅承

寶命統御鴻圖惟夙夜不敢康際春秋之鼎盛託身元元之

上勤思業業之中二十四年蓋如一日洪惟

昊穹祐順

列聖垂麻席化宇於承平民用和睦應昌期而篤祐身其康
強溯昨錫慶於五旬越今受釐者十載朕躬膺

懋眷心切棐忱誠百爾以咸勤慮一夫之不獲肄勞秋獮四

方足紀律之師率作春耕百里最循良之吏息牧垆於紫塞

甌脫長甯恬汎水於黃流尾閭直達俾予從欲以治敷民胥

康以生往者藁牙伏於畿南乃者堀堞噓由海上朕深思省

密益勵昕宵方懼人事之滋愆乃荷

天心之

昭鑒震雷消沴甘澍洗霾甄陶太和簫勺羣隱暘而暘雨而
雨克臻玉燭之調雲非雲烟非烟敢謂珍符之至幸三靈之

不應偕萬彙以咸亨爽惟民迪吉康毳斯世躋仁壽朕懷用

愜其敢自多今歲十月令辰為朕六旬慶節亦既却彼珍貢

屏厥繁文允念爾萬方祝嘏之忱宜沛朕九宇同仁之惠先

已特開慶榜茲庸覃錫恩綸綏萬邦屢豐年普延祺於有眾

大一統王正月爰布令於始和所有應行事宜開列於後

一五嶽四瀆等祀應遣官致祭著察例舉行

一 歷代帝王陵寢

先師孔子闕里應遣官致祭著察例舉行

一自王以下宗室覺羅十五歲以上者俱加恩賜

一滿漢大臣年六十以上者俱加恩賜

一內外滿漢文武各官俱加一級

一內外大小各官除各以現在品級已得封贈外凡陞級及改任著照新銜封贈

一國子監貢監生及各官學教習免坐監期一月

一各省儒學以正貢作恩貢以次貢作歲貢

一滿漢孝子順孫義夫節婦該管官細加諮訪確具事實奏交禮部核實旌表

一八旗滿洲蒙古漢軍兵丁及內扎薩克喀爾喀等蒙古年七十八十九十以上者分別賞賚至百歲者題明旌表

一軍民年七十以上者許一丁侍養免其雜派差役八十以上者給與絹一疋綿一觔米一石肉十觔九十以上者倍之至百歲者題明旌表

一直省有坍沒田地其虛糧仍相沿追納者該地方官查明咨部奏請豁免

一從前各省偏災地方所有借給貧民籽種口糧牛具等項查明實係力不能完者著予豁免

一各處養濟院所有鰥寡孤獨及殘疾無告之人有司留心以時養贍毋致失所

一各省軍流以下人犯俱著減等發落

一各省監禁人犯著將上年秋朝審緩決至三次各犯仍照節次查辦之例查明所犯情節分別減等發落其緩決一二次人犯內有案情本輕可與矜原者亦著該部查明請旨定奪

於戲凡厥庶民歸有極協五福於用敷暨予一人猷同心樂

萬年以承敘布告天下咸使聞知

嘉慶二十四年

上諭朕本年六旬大慶闔澤覃敷業經降旨蠲免直省積欠錢糧普惠黎元因念內外大小官員有賠繳官項者或其人已往而子姓單微或累本因人而攤追無已朕意欲量爲寬免除本身著賠之款無庸查辦外其本身已故子孫名下着追而子孫無現任四品以上職官者又本身原係分賠代賠者及其身已故又將分賠代賠之款在伊子孫名下着追者著八旗及各督撫查明案由銀數各歸各款分晰開單並於各名下註明已完若干未完若干有官者歸現任省分查辦無官者歸原旗籍查辦務各詳細查明不可稍有遺漏舛錯具奏到日交戶工二部分別查核彙題覆奏候朕酌量施恩

欽此

嘉慶二十五年

皇帝詔曰朕仰蒙

皇考高宗純皇帝授璽嗣位親承

訓政三年惟以敬

天法

祖勤政愛民爲保邦制治之大經履位以來嚴恭寅畏惟日孜孜思

天立君以爲民以養以教責在一人親政之初值川陝楚邪匪未靖訓勵統兵大員整飭戎行籌筆四載逋寇以次殲除嗣是海宇乂安閭閻樂業朕懷保惠鮮與民休息乃十八年復有奸民作慝闖入禁門逆黨勾連曹滑蔓延三省幸賴

上天祐順渠魁捕戮餘孽殄夷爲期曾不再月中外肅清朕深思邪教之害民屢申訓諭以肅吏治以正人心整綱飭紀期於政清而俗厚蓋未嘗一日釋諸懷也黃河自古爲中國患先是雲梯關下海口墊淤下壅上決屢有漫溢之警朕不惜帑金隄防疏濬俾復故道奏安瀾者越六七年上年秋霖異漲豫河南北漫口數處而武陟橫流穿運入海爲害最重今春督治甫告成功而南岸儀封復潰飭諭河臣於秋後興築業已程工撥帑計今冬可期歲事朕軫念民生惟懼一夫失所遇四方水旱之災蠲租發粟隨奏輒下上年朕六旬正慶薄海臣民臚歡獻祝愛戴出於至誠朕思逮以實惠詔蠲免積欠銀穀凡二千餘萬以期家給人足共登熙皞今歲自春徂夏以及於秋暘雨應時各省皆報豐登朕心悅豫孟秋

中旬恪遵

彝訓將舉木蘭獮典先駐蹕避暑山莊朕體素壯未嘗疾病雖年逾六旬登陟川原不覺其勞此次蹕途偶感暘暑昨仍策馬度廣仁嶺迨抵山莊覺痰氣上壅至夕益甚恐弗克瘳朕仰遵

列聖家法曾於嘉慶四年四月初十日卯初預立皇太子親書密緘鑄置秘匱十八年禁門之役賊踰宮垣皇太子手發火鎗連斃二賊餘黨驚墜禁籞獲安厥功甚鉅因建儲之命未宣先封智親王以獎殊庸今疾彌留神器至重允宜傳付乃命御前大臣軍機大臣內務府公啟密緘皇太子仁孝智勇必能欽承付託其卽皇帝位以嗣大統爲君之道在知人在安民朕嘗論之詳矣然而行之實難其深思而力持之登

進賢良愛養黎庶以保我國家億萬年丕丕基記曰孝者善繼人之志善述人之事可不勉哉朕貴為天子年逾周甲獲福亦云孔厚惟我後嗣克承予志使天下永享太平之福則朕之願慰矣朕受璽後二兄一弟同予侍養今春慶親王先逝自茲存者惟儀親王成親王遂不獲相見其二王一應罰俸處分著概予寬免書載虞舜陟方古天子終於狩所蓋有之矣況灤陽行宮為每歲臨幸之地我

祖考神御在焉予復何憾喪服仍依舊制二十七日而除布告天下咸使聞知

嘉慶二十五年

皇帝詔曰我大清篤承

天眷粵自

太祖

太宗肇造洪基

世祖統一區夏

聖祖

世宗

高宗德盛化神重熙累洽我

皇考大行皇帝臨御天下二十五年兢兢業業宵旰不遑以勤求上理政治休明朝廷祇肅仁心仁政洽於寰區用是中

外又安萬民蒙福方期景祚延洪永膺多祐詎意

臨幸灤陽遽升

龍馭

聖志先定於

親政之歲即以神器默屬藐躬朕自惟薄德深懼弗勝顧念列聖詒謀

皇考付託天位不可久虛勉抑哀忱欽遵

成命於八月二十七日祇告

天

地

宗廟

社稷即皇帝位以明年為道光元年仰紹

前徽撫衷寅惕際新綸之昭布宜錫類以推恩所有應行事

宜條列於左

一在京在外諸王以下至公等以上俱加恩賜

一內外自公主以下至格格各加恩賜

一內外滿漢文武大小官員俱加一級

一內外大小各官除各以現在品級已得封贈外凡陞級及改任者著照新銜封贈

一文官在京四品以上在外三品以上武官在京在外

二品以上照現任品級各蔭一子入監讀書

一內外文職自四品以下武職自三品以下降革留任及住俸罰俸處分准其開復

一會試額數俟禮部臨期奏明人數請旨酌量廣額鄉試大省加三十名次省加二十名小省加十名滿洲

蒙古加六名漢軍加三名

一各直省入學額數大學加七名中學加五名小學加

三名

- 一國子監貢監生及各官學教習免坐監一月
- 一各直省儒學無論府州縣衛俱於本年以正貢作恩貢次貢作歲貢
- 一每府州縣衛各舉孝廉方正暫賜以六品頂戴榮身以備詔用務期採訪真確毋得濫舉

歷代帝王陵寢

- 孔子闕里及五嶽四瀆等祀應遣官致祭者照舊例行
- 一官吏兵民人等有犯除謀反叛逆子孫謀殺祖父母父母內亂妻妾殺夫奴僕殺家長一家非死罪三人採生折割人謀殺故殺真正人命蠱毒魘魅毒藥殺

人強盜妖言十惡等真正死罪不赦外軍機獲罪隱匿逃人亦不赦外其餘自嘉慶二十五年八月二十七日昧爽以前已發覺未發覺已結未結者咸赦除之有以赦前事告訐者以其罪罪之

- 一各省軍流人犯查明到配三年實在安靜守法及年逾七十者釋放回籍

一各旗籍內務府及五旗包衣人等凡侵貪挪移一切賠罰應追銀兩實係本人家產盡絕者查明准予豁免其分賠代賠以及牽連著賠者一概豁免

- 一凡官員因公賠罰等項而其子孫又代祖父著賠者查明豁免

一旗營官兵有因出征及被災借支俸餉者免其扣還

一滿漢兵丁有曾經効力行間因被傷年老閒住者除例得優卹外查明酌加恩賚

一各直省有同堂五世及親見七代者除例賞匾額外查明各加恩賚

一天下之本農為重各府州縣衛果有勤於耕種務本力作者地方官不時加獎以示鼓勵

一年老之人自古所重滿漢七十以上除家奴外給與品級之處該部查議具奏

一除五旗包衣佐領下披甲人等不賞外八旗滿洲蒙古漢軍護軍披甲人炮手步軍各賞一月錢糧

一軍民年七十以上者許一丁侍養免其雜派差役八十以上者給與絹一疋綿一觔米一石肉十觔九十

以上者倍之

一各處養濟院所有鰥寡孤獨及殘疾無告之人有司留心以時養贍無致失所

於戲膺茲繼體用康乂我兆民弼予仔肩式敬承夫丕緒諸王文武大小臣工其各抒忠悃翊贊鴻猷以光我國家億萬年無疆之祚布告天下咸使聞知

嘉慶二十五年

皇帝詔曰朕惟自古帝王甄陶元化錫羨延洪參壽載以侔勲暢垓埏而徧德爰有隆稱鴻號薦廟崇徽所以闡彝憲之式昭示尊親之共戴迪前光而迓祉福誠鉅典也欽惟皇考大行皇帝

體元立極

表正垂型

健順同符自強之功不息

勲華繼統重光之運維新溯癸巳之

薦馨誠孚

默告迨丙辰之

受璽敬紹

親傳日聆

訓政以恢謨時奉

詒謀而敷治

瑤壇潔饗

昊貺靈甄

黼構崇禋

先型陟降紺轅載耒

勤藉畝以加推

闕殿升歆謁

橋山而展采誦

寶錄而殷懷

手澤泣

講筵而遠契心源中正協於乾行神智周乎泰運披章引對

乙夜忘勞省歲陳常

寅衷無逸杜方州之貢獻整飭廉隅定泉府之盈餘流通關

市誥誠特先乎宗室勸懲交勵於官聯還淳以正人心警怠

以勤吏治軫茅檐之儉歲蠲賑頻施恤棘寺之祥刑胥災肆

赦龍門疏派籌河則鞏固長隄鯨島潛蹤防海則平消駭浪

幅員既廣漸被尤宏戊校丁屯受犁庭者萬里蔥山鹽澤環
列燧者千城沐

闔惠之涵濡徧遐陬而怙冒銅街闢邸並集年班珠海輸琛
虔修歲事圍場負弩瞻

行幄以冕趨蕃部連營奉盟書而蟻附蓋惟德懷威畏是以
遠至邇安若乃建

皇極之敷言觀人文而成化

宸章詒訓義貫乎疇圖

奎藻分編體兼乎雅頌玉堂

駕幸錫宴聯吟璧水

躬臨園橋聽講校士則宗潢偕選烝髦而恩榜頻開纂典禮
而上媿周官編文穎而旁搜藝苑集三唐之著作薈萃英華

廣一統之方輿詳徵沿革聿新

文教載溯

武功初平川楚之塵氛聲靈有赫繼值滑曹之煽動撻伐斯
張虞干迅格於兩階湯網宏開於一面葺功早奏講武仍勤
總兵政於中樞練軍容而大閱鷹臺列隊禮備春蒐虎旅從
戎歲行秋獮纘

十全而紀績歌七德以宣威綜廿五載之敕幾垂億萬年而
作則篤貺崇乎

天眷麻徵啓自

皇猷顯融以覲

耿光懿鑠以揚

大烈惟

文武聖神之廣運本

聰明睿知以有臨朕仰蒙

高厚之恩渥荷

鈞陶之範昭宣

謨烈恪守

儀型啓牖詩書凜遵

訓誨憶昨

甲周衍慶方曼壽以臚歡今茲

丙馭時巡遽

升遐而棄養終天銜恤莫罄哀悽率土輸忱難名

魏蕩謹命諸王貝勒大臣文武羣臣敬考彝章詳議

諡號百辟卿士僉言允符祇告

天

地

宗廟

社稷以嘉慶二十五年十月二十一日敬奉

冊

寶恭上

皇考大行皇帝

尊諡曰

受天興運敷化綏猷崇文經武孝恭勤儉端敏英哲睿皇帝

廟號曰仁宗既鏤文而謨德宜錫類以推恩所有事宜開列

於後

一嶽鎮海瀆廟宇傾頽者該地方官奏明修葺以致誠

敬

一內外大小各官除各以現在品級已得封贈外著照新銜封贈

一在京滿漢文武大小官員俱各加一級

一在京王公文武官員任內有革職留任及降級罰俸者咸與開復又在京官員現在議降議罰者悉行豁免

一外藩蒙古王公以下台吉以上有罰俸住俸者咸與開復其現在議罰者悉行豁免

一會試文武舉人已經中式者除過犯黜革外其有殿試謄寫錯誤不合體式者禮兵二部察明核實准其再行殿試

一鄉試已經中式文武舉人除過犯黜革外其有磨勘

原卷字句錯誤以致停科者俱著寬免准其會試

一滿漢孝子順孫義夫節婦該管官細加諮訪確具事實奏聞禮部核定以憑旌表

一各省道路橋梁間有損壞者著地方官查明修理以利行旅

一各處養濟院所有鰥寡孤獨殘苦無告之人有司留心以時養贍勿致失所

一現在內外監候質審及干連人等俱著准其保釋

一軍流人犯有本人身故其妻子情願回籍者該管官報明該部准令各回原籍

於戲不顯不承允膺受乎多福是彝是訓用敷錫厥庶民慰

順羣情導揚盛典布告天下咸使聞知

嘉慶二十五年

皇帝詔曰朕惟古帝王膺圖纘緒惇典求章必本慈訓以宣
光奉母儀而篤祐粵稽頌歌濬哲歸美商娥雅詠思齊崇稱
京室載觀往牒聿著隆規欽惟

聖母皇太后

履順承天

含章應地

懿德昭於圖史

徽音式於庭闈

鳳輦陳儀圭璋自協龍文作繪澣濯仍勞秉肅敬以持躬務
儉勤而立範贊襄

帝治孚鑒

天心

顯謨肇自睢麟弗祿縣夫瓜瓞公桑奉種禮重

親蠶豐芑垂型

恩隆詒燕朕聰聽承夫

彝訓臚懽浹於

深仁

蘭掖崇頤懋膺禔祉蘿圖席瑞允慶昇平啓鼎祚之延洪同

臻曼壽仰

坤儀之博厚恪奉

徽稱諮議僉同典常具備祇告

天

地

宗廟

社稷於嘉慶二十五年十二月初二日率諸王貝勒大臣文武羣臣謹奉

冊

寶敬上

皇太后尊號曰

恭慈皇太后尊親溥徧於垓埏膏澤均霑於陬澨所有事宜開列於後

- 一 在內親王之福晉以下公之妻以上著加恩賜
- 一 外藩蒙古諸王之福晉以下公之妻以上著加恩賜
- 一 民公侯伯以下二品大臣以上命婦著加恩賜

一 從前尚過公主格格之額駙等照伊等品級著加恩賜

一 從前恩詔後陞職加銜補官者悉照現在職銜給與封典

一 在京文官四品以上武官三品以上著各加一級

一 在京王公文武官員任內有降級罰俸住俸者咸與

開復又在京官員現在議降議罰者悉予豁免

一 外藩蒙古王公以下台吉以上有罰俸住俸者咸與

開復其現在議罰者悉予豁免

一 京城巡補五營兵丁著加恩賞給一月錢糧

一 除十惡不赦外犯法婦人盡行赦免

一 上三旗包衣佐領下拜唐阿及太監等著賞給一月

錢糧

一罰贖積穀原以備賑冬月嚴寒鰥寡孤獨貧民無以爲生著直省各督撫令有司務將積穀酌量賑濟毋令奸民假冒支領

一各處効力贖罪人員向無定限多致苦累殊堪矜憫著各該管官查係已滿三年者聲明犯罪緣由奏請酌量寬免

一內務府莊頭等所有累年積欠在嘉慶二十四年以前者查明請旨豁免

於戲共球並集合四海之歡心壽載同符錫萬年之景福布告天下咸使聞知

番禺金錫齡分纂

番禺金佑基初校

番禺史悠履再校

番禺金俊基三校

番禺史悠泰四校

廣州府志卷三終

廣州府志卷四

訓典四

道光四年

上諭御史程邦憲奏各省京控案件請嚴飭推鞫一摺所奏是外省民人赴京控告之案雖由於原審官任性偏斷小民負屈求伸以致遠來呼籲其中雖不無逞刁訐唆之徒為之播弄然以羸老窮蹙跋涉寒暑均所不恤揆其情節抑豈盡皆誣捏該督撫經朕特發交審或由都察院轉咨審訊自應親提人證按律定擬無枉無縱若如該御史所奏查核咨結之案所控得實者百無二三是明係委審各員瞻徇附和該上司迴護屬吏顧慮考成從而彌縫完結卽如山西閻思虎強姦釀命一案以降旨交審之件必經刑部提犯研鞫始得

昭雪沉寃此外之視為具文是非顛倒者又豈能以數計似此案牘繁多草率從事含寃莫訴苦累愚氓亦安用此督撫大吏為乎嗣後著各督撫將軍都統等遇京控事件務須親為聽斷寃抑者立為伸理刁訟者從嚴懲治其有任意延宕不結者即將提解逾限之員先行參辦以冀讞訟持平期於無刑慎毋仍前玩視也

道光十五年

皇帝詔曰朕惟瑤圖篤祐萬年迓昌熾之休珍冊騰輝六幕仰尊親之戴矧純嘏方延夫景福宮壺承歡斯上儀式煥乎彝章家邦錫慶必禮文之賅備庶尊養之兼隆欽惟恭慈康豫安成莊惠皇太后陛下
德配乾元

功符坤厚

椒塗佐化常調玉燭之辰

萱殿垂型肇啟珠囊之治播

徽音於禁掖燕翼謀詒敷

原澤於垓埏

鴻慈光被瑞凝長樂欣依

愛日之安舒慶集恆春永駐

恩暉之和煦茲以乙未孟冬之月恭逢六旬

聖壽之期昌辰乍啟韶華先兆夫陽和綺甲初周曼羨益增

夫禔福瞻

璿闈而介祉景貺頻臻環瑤海以臚愉

隆稱載晉祇告

天

地

宗廟 社稷於道光十五年十月初九日率王公文武羣臣恭奉

冊寶加上

恭慈皇太后徽號曰

恭慈康豫安成莊惠壽禧皇太后喜洽

瑤墀申錫上無疆之祝祥開

玉檢維祺衍有道之長慶典斯成洪恩特沛所有應行事宜開列於後

一 歷代帝王陵寢

先師孔子闕里應遣官致祭著祭例舉行

一 五嶽四瀆等祀應遣官致祭著照舊例舉行

一 王妃以下奉恩將軍之妻以上俱加恩賜

一 公主以下鄉君以上俱加恩賜

一 滿漢大臣命婦年六十以上者俱加恩賜

一 外藩王妃以下公妻以上俱加恩賜

一 在京滿漢文武大小官員俱各加一級

一 內外大小各官除各以現在品級已得封贈外凡升

級及改任者著照新銜封贈

一 內外官員有因公註誤革職留任者該部查明奏請

開復

一 凡試職各官俱准實授

一在京八旗兵丁俱著賞給一月錢糧

一滿洲兵丁原係披甲効力行間因疾病年老閒住者著察加恩賜

一八旗滿洲蒙古漢軍兵丁及內札薩克喀爾喀等蒙古年七十八十九十以上者分別賞賚至百歲者題明給與建坊銀兩

一軍民年七十以上者許一丁侍養免其雜派差役八十以上者給與絹一疋綿一斤米一石肉十斤九十以上者倍之至百歲者題明給與建坊銀兩

一滿漢孝子順孫義夫節婦該管官細加諮訪確具事實奏聞禮部覈實以憑旌表

一各省儒學以正貢作恩貢次貢作歲貢

一國子監監生免坐監一月

一凡嶽鎮海瀆廟宇有傾頽者該地方官估計價值具奏修葺以昭敬誠

一歷代帝王陵寢有毀壞者該督撫察明具奏修葺

一各省道路橋梁間有損壞者著地方官查明修理以利行旅

於戲官

聖善以延釐式符日月升恆之頌播

宸慈而錫類允洽龔軒鼓舞之忱布告天下咸使聞知

道光二十五年

皇帝詔曰朕惟璆冊延洪穀式衍熾昌之祚瑤圖篤祐芸生

攄愛戴之誠矧鴻庥懋晉於千齡歡承宮闈斯駿惠廣敷於八表慶溢寰區必具備乎儀文庶兼隆乎尊養欽惟

恭慈康豫安成莊惠壽禧皇太后陛下

德配乾元

功符坤厚

軒星佐化常昭金鏡之輝

如幄垂型肇啟珠囊之治著

徽音於紫禁保艾謀長溥

渥澤於黃圖編茅化洽

東朝萃祉欣依

愛日之安舒南極騰光永耀

恩暉之和煦茲以乙巳孟冬之月恭逢七旬

聖壽之期景駐恆春吹律適乘乎陽月祥開復旦稱觥益茂

夫長年瞻

寶籙以介修齡蕃釐畢集奉瓊編而揚

懿德

嘉號丕隆祇告

天

地

宗廟

社稷於道光二十五年十月初六日率王公文武羣臣恭奉

冊寶加上

恭慈康豫安成莊惠壽禧皇太后徽號曰

恭慈康豫安成莊惠壽禧崇祺皇太后喜洽

管闈申錫上萬年之祝瑞呈

芝檢壬林臚六幕之歡慶典斯成洪恩特沛所有應行事宜開列於後

一

歷代帝王陵寢

先師孔子闕里應遣官致祭著察例舉行

一五嶽四瀆等祀應遣官致祭著照舊例舉行

一王如以下奉恩將軍之妻以上俱加恩賜

一公主以下鄉君以上俱加恩賜

一滿漢大臣命婦年六十以上者俱加恩賜

一外藩王如以下公妻以上俱加恩賜

一在京滿漢文武大小官員俱各加一級

一內外大小各官除各以現在品級已得封贈外凡升級及改任者著照新銜封贈

一內外官員有因公註誤革職留任者該部查明奏請開復

一凡試職各官俱准實授

一在京八旗兵丁俱著賞給一月錢糧

一滿洲兵丁原係披甲効力行閒因疾病年老閒住者著察加恩賜

一八旗滿洲蒙古漢軍兵丁及內札薩克喀爾喀等蒙古年七十八十九十以上者分別賞賚至百歲者題

明給與建坊銀兩

一軍民年七十以上者許一丁侍養免其雜派差役八

十以上者給與九品頂帶九十以上者給與八品頂帶百歲以上者給與七品頂帶一百二十歲以上者給與六品頂帶百歲至一百二十歲以上者均仍題明給與建坊銀兩

一滿漢孝子順孫義夫節婦該管官細加諮訪確具事實奏明禮部覈實以憑旌表

一各省儒學以正貢作恩貢次貢作歲貢

一國子監監生免坐監一月

一凡嶽鎮海瀆廟宇有傾頽者該地方官估計價值具奏修葺以昭誠敬

歷代帝王陵寢有毀壞者該督撫察明具奏修葺

一各省道路橋梁間有損壞者著地方官查明修理以利行旅

於戲播

宸慈而錫類允協嵩呼華祝之忱彰

聖善以凝祥益符月恆日升之頌布告天下咸使聞知

道光二十九年

上諭據徐廣縉奏熟籌暎夷進城之事實屬萬不可行又據葉名琛穆特恩等奏遵旨嚴防並加意撫戢兵民各一摺暎夷進城之約在當日本係一時羈縻如該督等所陳該夷必欲進城其居心實不可問婉阻之未必遽開邊釁輕許之必致立啟兵端現在該省兵民共相保護共有十萬之眾是眾志成城自當勗其同仇何難使之解體且據葉名琛穆特恩

等奏稱內河外河現飭一律嚴防不至少有疎虞著徐廣縉等卽就現辦情形隨時體察外患固屬堪虞內變尤爲可慮務當固結民心激揚士氣以安民爲撫夷之本仍飭水陸各處防範萬不可稍有疎失方臻妥善惟兵在精而不在多人數旣眾未必人人有勇知方從前有暗釘礮眼私自送信走漏消息鄉民及兵丁內均難免此種叛徒若一味信其甘言恐臨時不免挫衄至于看守礮臺之兵尤當擇其有身家保結者方可信任前車之鑒切宜留心其各海口應否密爲知照令其豫防竄擾之處並著該督等酌量妥辦倘察看夷情尙順無需知照之處亦在該督酌而行之總之該夷聞風畏懼不肯深入受創其暗中含沙射人固在意計之中卽心內深恨不能遂願外作好語與粵之兵民固作游移而另圖遠謀爲擾我腹心之地其狡詐亦應加意體察該督等同心敵愾深堪嘉尙操縱之法朕絕不爲遙制倘能沿海各省皆能如此足食足兵朕無憂矣

道光二十九年

上諭據徐廣縉葉名琛密陳夷追溯進城約期一事懇求代奏並將照覆稿底呈覽一摺覽奏均悉進城一事本年春間已據該會照會後不復辨論乃復以該國王函詢者英定約各國皆知何以屆期又徑阻止懇將此意速爲代奏自緣進城未能如約懷慙起釁加以噫會回國必籍口居功歸怨咬嚼以致咬會再三懇懇其情已可概見業經該督等酌理準情剴切照覆該會自亦無可置辯惟將來或有再請仍須照覆諭以天朝撫馭外藩向以誠實相待入城之舉揆諸事

勢百姓既不相容夷人必受重創豈肯不以實告況罷議進城後貿易漸旺已有明徵若復申前說則商人裹足不前民人之同心共憤又將如今春故事該會亦何苦受此困累耶至前之定期不過從俗從宜一時權宜之語日久相安仍當以時為大該國最重貿易現在貨物流通又何必仍詢前約致令商民疑慮諸多窒碍天朝唯知上順

天心下從民願以懷柔為本斷不任民人稍事欺凌該國王亦當體會此意安心貿易勿生枝節經此番勸諭之後該夷自必就範而闔城文武軍民戮力同心毅然有不搖之勢朕何憂乎

道光二十九年

上諭夷務之興將十年矣沿海擾累糜餉勞師近年雖畧臻

靜謐而馭之法剛柔不得其平流弊以漸而出朕深恐沿海居民有蹂躪之虞故一切隱忍待之蓋小屈必有大伸理固然也昨因英夷復申粵東入城之請督臣徐廣縉等連次奏報辦理悉合機宜本日又由驛馳奏該處商民深明大義捐資禦侮紳士實力勸入城之議已寢該夷照舊通商中外綏靖不折一兵不發一矢該督撫安民撫夷處處皆挾根源令該夷馴服無絲毫勉強可以歷久相安朕嘉悅之忱難以盡述允宜懋賞以獎殊勲徐廣縉著加恩賞給子爵準其世襲並賞戴雙眼花翎葉名琛著加恩賞給男爵準其世襲並賞戴雙眼花翎以昭優眷所有粵省文武各員着徐廣縉等擇其尤為出力者酌量分別保舉候朕施恩至我粵東百姓素稱驍勇乃近年深明大義有勇知方固由化導之神亦

係天性之厚難得十萬之眾利不奪而勢不移朕念其翊戴之功能無惻然有動於中乎着宣布朕言俾家喻戶曉益勵急公向上之心共享樂業安居之樂第其勞勩錫以光榮毋稍屯膏以慰朕意欽此

道光三十年

皇帝詔曰朕蒙

皇考仁宗睿皇帝覆載隆恩付畀神器臨御天下盈三十年仰惟

列聖家法一以敬

天法

祖勤政愛民爲本自維薄德敢不朝乾夕惕惟日孜孜故自御極至今凡披覽章奏引對臣工盱食宵衣三十年如一日

不敢自暇自逸並躬行節儉爲天下先嗣位之初卽頒手諭首戒聲色貨利一切游觀玩好稍涉奢靡之事禁絕弗爲此薄海臣民所共見溯自西陲小蠢出師撻伐旋致收平何敢自矜武略迨後東南瀕海之區因貿易而啟紛爭朕惟古之君子愛人爲大何忍無辜赤子慘罹鋒鏑用是捐小忿成大信綏疆柔遠於今十載卒使毒燄自消民夷各安生理此朕孳孳愛民之隱衷至今日而庶堪共諒者也至水旱成災朕竊自愧致累吾民昕夕憂勞不惜特發帑金拯民疾苦凡置臣請蠲請賑無不立沛恩施從未屯膏靳澤已飢已溺之懷亦中外所共見侍奉皇太后已及卅年娛志承

歡敬謹罔懈慎終盡禮差免愆尤朕體氣素強自上年春夏之交偶爾違和加意調攝總未復元去臘還宮後痛遭

大行皇太后大事猝踊摧傷漸形虧弱邇來氣益上逆病勢日臻追維在位歷三十年壽登六十有九亦復何憾顧念統緒至重亟宜慎簡元良續承大業本日卯刻特召見宗人府宗令御前大臣軍機大臣內務府大臣親降硃筆諭旨立皇四子奕訢為皇太子並諭王大臣等同心贊輔無恤其他乃降旨甫經半日神氣漸散豈非天乎皇太子秉性仁孝植德貞醇必能欽承付託其即皇帝位以嗣大統

天生民而立之君使司牧之惟刻矢憂勤惕勵於以知人安民永保我不丕基於觀人之法鑑空衡平妍媸輕重自見惟無私乃克有濟兼願中外文武臣僚精白乃心各勤厥職

用輔嗣皇帝邇隆之治則朕懷益慰矣喪服仍依舊制二十七日而除布告天下咸使聞知

道光三十年

皇帝詔曰我大清篤承

天眷粵白

太祖

太宗肇建丕基

世祖統一函夏

聖祖

世宗

高宗

仁宗德盛化神重熙累洽我

皇考大行皇帝臨御天下三十年宵衣旰食躬治勤求熙績
釐工朝廷祇肅

深恩厚澤洽於寰區用是中外乂安羣黎蒙福方期景錄延
洪永膺多祐詎意正月十四日

諭立朕為皇太子甫經半日

龍馭遽升即以神器屬於藐躬朕自維薄德深懼弗勝顧念
列聖詒謀

皇考付託天位不可久虛勉抑哀忱恪遵

成命於正月二十六日祇告

天

地

宗廟

社稷即皇帝位以明年為咸豐元年仰紹

前徽撫衷寅惕際茲新綸之布用推錫類之恩所有應行事

宜條列於左

- 一在京在外諸王以下至公等以上俱加恩賜
- 一內外自公主以下至格格各加恩賜
- 一內外滿漢文武大小官員俱加一級
- 一內外大小各官除各以現在品級已得封贈外凡陞
級及改任者著照新銜封贈
- 一文官在京四品以上在外三品以上武官在京在外
二品以上照現任品級各廕一子入監讀書
- 一內外文職自四品以下武職自三品以下降革留任
及佳俸罰俸處分准其開復

- 一 會試額數俟禮部臨期奏明人數請旨酌量廣額鄉試大省加三十名次省加二十名小省加十名滿洲蒙古加六名漢軍加三名
- 一 各直省入學額數大學加七名中學加五名小學加三名
- 一 國子監貢監生及各官學教習免坐監一月
- 一 各直省儒學無論府州縣衛俱於本年以正貢作恩貢次貢作歲貢
- 一 每府州縣衛各舉孝廉方正暫賜以六品頂戴榮身以備詔用務期採訪真確毋得濫舉

歷代帝王陵寢

孔子闕里及五嶽四瀆等祀應遣官致祭者照舊例行

- 一 官吏兵民人等有犯除謀反叛逆子孫謀殺祖父母父母內亂妻妾殺夫奴婢殺家長一家非死罪三人採生折割人謀殺故殺真正人命蠱毒魘魅毒藥殺人強盜妖言十惡等真正死罪不赦外軍務獲罪隱匿逃人亦不赦外其餘自道光三十年正月二十六日以前已發覺未發覺已結未結者咸赦除之有以赦前事告訐者卽以其罪罪之
- 一 各省軍流人犯查明到配三年實在安靜守法及年逾七十者釋放回籍
- 一 各旗籍內務府及五旗包衣人等凡侵貪挪移一切賠罰應追銀兩實係本人家產盡絕者查明准予豁免

免其分賠代賠以及牽連著賠者一概豁免

一凡官員因公賠罰等項而其子孫又代祖父著賠者查明豁免

一旗營官兵有因出征及被災借支俸餉者免其扣還
一滿漢兵丁有曾經効力行間因被傷年老閒住者除例得優卹外查明酌加恩賚

一各直省有同堂五世及親見七代者除例賞匾額外查明各加恩賚

一天下之本農爲重各府州縣衛果有勤於耕種務本力作者地方官不時加獎以示鼓勵

一除五旗包衣佐領下披甲人等不賞外八旗滿洲蒙古漢軍護軍披甲人礮手步軍各賞一月錢糧

一軍民七十以上者許一丁侍養免其雜派差役八十以上者給與九品頂帶九十以上者給與八品頂帶百歲以上者給與七品頂帶一百二十歲以上者給與六品頂帶百歲至一百二十歲以上者均仍題明給與建坊銀兩

一各處養濟院所有鰥寡孤獨及殘疾無告之人有司留心以時養贍無致失所

於戲膺茲繼體用惠錫於垓埏粥子仔肩式撫綏夫兆庶諸王文武大小臣工其各抒忠悃翊贊鴻猷以昭我國家億萬年無疆之祐布告天下咸使聞知

道光三十年

皇帝詔曰朕惟自古帝王受錄提釐樹元御寓侔一儀以徧

德被四表而崇光爰是薦廟奉儀升彝顯號洪昭美善永戴
尊親蓋以迪前光揚聖憲迓上祉勳崇章也欽惟

皇考大行皇帝

秉理中和

懋修精一

勳華延祚宣繼述之光

健順符坤式崇卑之度

帝祺肇煥

皇道維新若夫孚

昊升歆奉

先潔饗肅三登而鬯節諧七始而迎嘉

盛德承以顯融

靈麻貺乎陟降

慈宮穆穆喜洽祥流

尊履蒸蒸色愉儀恪山淵格於榮耀日月昭其光華若乃合

氣承功披元養化規

天理物六通四辟之謨任地依神八則九宜之治下方浹矣

上緒融焉然且勗逸加勞簡心兢志去甚去泰忱其無華為

風為愆

誠於有位而乃

敷言炳藻崇學甄書斟酌百家光輝萬宇彬儀雅頌襲六以

成編韜映疇圖兼三而立極聿昭

文德載奮

武功

大勇宣威蕩諸蠹類中樞肅政詰爾戎兵延舉南來聲靈北
變綏置獲醜皇皇四代之勲緝遠柔藩赫赫東漸之化由是
垓埏永乂輿蓋咸敷洽務氣於

祈年登農功以

御耦游原泳沫區宇覃和佩惠蒙慈浮潛育澤乃復

倣予是惕眷彼非劬恤儉矜災蠲租賚實水平土茂召泰象
於雍雍罰當刑平崇時風以晏晏至於省官省吏典穆三升
澄外澄中弊嚴六計功庸實顯康哉百爾之良道德相親熙
若九宗之好培材毓俊標賞忠清舉孝興廉優旌耆父陶鈞
品物粲晏區方庶政和而八風平民氣洽而九歌作惟煌惟
燁乃

聖乃

神臨六合而均禧協三才以闡極巍巍蕩蕩蓋三十年僣僣
嶢嶢垂億萬載朕幸蒙

覆載恪奉

儀型殷承

啟牖之恩冀永

頤和之侍

升遐遽痛載慄

詒謀銜恤彌悽永懷

聖德思升

諡

號丕著崇闕延曜來章比榮往哲百辟卿士僉言允符用是
謹擇良辰恪修鉅典祇告

天

地

宗廟

社稷於道光三十年四月十二日率諸王貝勒文武羣臣敬

奉

冊

寶恭上

皇考大行皇帝

尊諡曰

效天符運立中體正至文聖武智勇仁慈勤儉孝敏成皇帝

廟號曰

宣宗禮備崇親恩推錫類所有事宜開列於後

一嶽鎮海瀆廟宇傾頽者該地方官奏明修葺以致誠

敬

一內外大小各官除各以現在品級已得封贈外著照

新銜封贈

一在京滿漢文武大小官員俱各加一級

一在京王公文武官員任內有革職留任及降級罰俸

者咸與開復又在京官員現在議降議罰者悉行豁

免

一外藩蒙古王公以下台吉以上有罰俸任俸者咸與

開復其現在議罰者悉行豁免

一會試文武舉人已經中式者除過犯黜革外其有殿

試謄寫錯誤不合體式者禮兵二部察明核實准其

再行殿試

一鄉試已經中式文武舉人除過犯黜革外其有磨勘原卷字句錯誤以致停科者俱著寬免准其會試

一滿漢孝子順孫義夫節婦該管官細加諮訪確具事實奏聞禮部核實以憑旌表

一各省道路橋梁間有損壞者著地方官查明修理以利行旅

一各處養濟院所有鰥寡孤獨殘苦無告之人有司留心以時養贍勿致失所

一現在內外監候質審及干連人等俱著准其保釋

一軍流人犯有本人身故其妻子情願回籍者該管官報明該部准令各回原籍

於戲長世延祺允膺受乎多福廣寰耀德用敷錫厥庶民慰順羣情昭揚盛典布告天下咸使聞知

咸豐元年

上諭通政使羅惇衍奏請崇儉禁奢一摺國家承平日久生物繁滋官民競尚奢華於風俗人心大有關係必當申明舊例以復醇風道光年間曾奉

諭旨內外各衙門將民間應用服色及婚喪儀制悉照會典所載刊刻簡明規條使百姓知所恪守乃近來奢靡之風未能盡革總因有司奉行不力視爲具文規條久不頒行鄉曲無由曉諭俗吏積習相沿以條教爲迂談以化導爲末務將所謂上行下效者安在耶著禮部查明道光八年頒行簡明規條通行內外各衙門遵照刊刻出示通行曉諭俾民間有

所遵循務歸醇樸以副朕崇儉黜奢至意將此通諭知之

禮部尋奏臣等查原奏內稱道光初年閭巷之間尚多儉約自持者今則汰侈是從恬不為怪遇有婚嫁喪葬等事輒費千餘金或數百金無者多方稱貸以取辦集又京外各官尋常宴會動至一席費五六金外官款宴上司竟有一日而費百金者道光八年原任大學士富俊奏官民服用奢靡踰制請嚴加禁遏會命內外各衙門將民間應用服飾及婚喪儀制查照會典刊刻簡明規條使百姓知所恪守乃有司未能奉行請旨飭下禮部就會典通禮二書撮其簡約常用者以為條教之式等語臣等謹考孟子有云食之以時用之以禮則財不可勝用該通政使欲令京外官民於吉凶事宜悉遵典禮服食器用概歸省約係為正俗厚生起見我朝秩敘之精損益之善具載於會典通禮二書第卷帙浩繁人不易購道光八年恭奉諭旨著內外各衙門刊刻簡明規條經臣部通行在案乃近來奢靡之風未盡革除如聖諭責在有司亟應共挽頹風期歸淳樸覆查原任大學士富俊原奏所擬規條祇有五款尚未詳備臣等公同酌議謹就會典通禮二書內擇出吉凶冠服各事宜之最切於官民者撮其大要務使簡而易行復參以臣部則例證以朱子家禮全書附為按語明白宣示計官民婚喪冠服等事簡明規條十九款另繕清單伏候欽定俟命下之日通行內外各衙門遵照刊刻出示曉諭庶上行下效知所遵守禮教正而風

化端以仰副 皇上崇儉黜奢之至意所有恭擬簡明規條緣由是日奏奉 旨依議欽此訓示遵行謹 奏咸豐二年正月二十二日奉 旨依議欽此
一會典載凡有品級官員婚嫁或用本官執事鼓樂人不得過十二名鑼不得過六對無品級人及生監軍民不得僭用執事鼓樂人不得過八名鑼不得過四對一應糜費概行禁止
一通禮載品官婚禮納幣章服一稱章如其品一品至四品表裏各八兩容飾合八事職之器食品十器五品至七品表裏各六兩容飾合六事食品八器庶士婚禮章服一稱表裏各四兩容飾合四事食品六器庶人婚禮禮服一稱用帛無章綢絹各四兩容飾合四事食品四器
一通禮載婚日設燕一品官具筵十五席二品官十三席三品官八席四品官六席五品官五席六品官至九品具筵俱用牲三軍民人等具筵用牲一庶民婦女有僭用冠帔補服大轎者禁不聽聽其體驗其量其備物不得僭用冠帔右婚禮規條臣等謹按朱子全書云古人納幣五兩若計繁簡是以利言吾儕無望於復古風俗更教誰變可見去瀛尚樸婚禮為先乃近來徒事奢侈錦繡金珠兩家羅列迎娶之綵輿鑿仗會親之酒筵犒賞富家爭勝貧者效尤既不為子女惜福又不以入口自計甚有生男則喜生女則戚至有不舉其女者其故皆由縉紳不以節儉相先以為民則通禮所載簡約易行悉宜遵守

一會典載棺罩一二品官用銷金青藍等緞三四品官用青藍雲緞六七品官用青緞及青藍緞九品以下官員生監用青絹兵丁庶民用青布如伊父母原有官封誥命准照品級使用

一會典載一品官鞍馬六匹初祭筵十席羊五大祭同二品官鞍馬五匹初祭筵八席羊四大祭同三品官鞍馬四匹初祭筵六席羊三大祭同四品官鞍馬三匹初祭筵五匹初祭筵以下有項帶官員以上鞍馬二匹初祭筵四席羊二大祭同六品以下有項帶官員一匹初祭筵二席羊一大祭同

一會典載凡有項帶官員周年百日上墳常祭祭筵羊隻各照定例內減半用庶民常祭亦照定例從減

一會典載官員等喪葬除賃用槨棺罩執事外其鞍馬衣箱等項量力照例備用力不能備者聽其節省奇巧樓臺等項概從禁止

一通禮載品官發引靈車役夫二品以上六十四人五品以上四十八人八品以上三十二人九品及有項帶者二十四人庶人十六人

右喪禮規條臣等謹按孔子嘗言喪具稱家有無勿過禮苟無矣懸棺而封人豈有非之者夫孝子之事親非沾以財事也而稱其財亦謂之禮朱子家禮有造明器下帳之文乃不忍死其親之意今人治喪其費甚侈緇黃之懺度不敢廢也侍從之酒食布帛不敢不豐也蕭棚一項務不敢不盛也賓客之酒食布帛不敢不豐也蕭棚一項務

極奇巧又有於出殯前夕招集親朋鄰族開筵飲謂之鬧喪或於停喪處所連日演戲舉殯之時復扮演雜劇戲具非惟於理不合抑亦於情何忍至於展墓之說既見於經故通禮有寒食霜降素服具酒饌詣墓拜掃之文朱子亦云行墳域省封樹剪荆棘培土壤以致其怵惕悽愴之意若於上塚之時召客宴會甚非所宜又俗遇父母忌日飲酒食肉殆非人情當遵朱子家禮及語類所載變冠服不宴會為正若遇父母生日追薦冥壽結綵張筵忘親失禮莫此為甚故通禮無生辰之奠均宜禁止

一會典載吉服冠一品至九品鑲金為座頂一品珊瑚二品鑲花珊瑚三品藍寶石四品青金石五品水晶六品磬七品素金頂八品鑲花陰文金頂九品鑲花陽文金頂未入流視九品服一品至三品得用貂絨及蟒繡金花綵蟒繡及金花繡補服文一品鶴二品錦雞三品孔雀四品雁五品白鵝六品鷺七品鸕八品鵝九品孔雀四品

一品麒麟二品獅三品豹四品虎五品熊六品七品彪八品犀牛九品海馬士庶公服狀元頂帶視六品會試中式貢士冠用裏金三枝九葉頂服均如常制舉人官生貢生監生冠帶視八品服以錫又查道光八年臣部會同大學士九卿議准舉人冠頂以錫又查道光八年臣部會同大學士照八品官例用陰文鑲花金頂生員監生仍戴用銀頂一會典載凡王公以下服不得用黃色秋香色及黑狐皮

五品官以下不得用蟒緞縹緞貂皮猓猓八品官以下不得用大花紗緞及白豹天馬等皮
一會典載凡內外文武大小官員頂帶補服坐褥悉照本
身現任品級不得計算加級僭越服用
一會典載軍民人等准用綢綾紡絲綿綢繭紬絹葛校
布狼狐貉羊等皮冠用染駝鼠狐貉沙狐皮帽上圓月准
用片金不得用狐狀沙狐狀緞紗及緞鞞鞞鞞鞞鞞鞞鞞
綠斜皮器飾不得用金僧道除袈裟法衣外准用綢緞紡
絲素紗各色布其袍用土黃色緋色
一會典載商賈有捐納職銜者冠服各從其品無職銜者
與庶民同
一典禮載民人冬夏帽上不得用絨纓大結
一典禮載考職吏員在籍止用頂帽不得僭用補服內外
各衙門供事書吏非年滿考職者不得僭用金頂
一典禮載奴僕優伶卑隸許用繭紬毛褐葛布梭布貉皮
羊皮其紡絲綢絹緞紗綾羅各種細毛及石青色衣俱不
得服用冬帽用染駝鼠狐貉獬豸不得用貂
一會典載馬鞍及庫使舉人官生貢監生員護軍領催以至
品級筆帖式及庫使舉人官生貢監生員護軍領催以至
兵民等馬鞍不得用繡及倭緞絹線鑲緣鞞鞞鞞鞞鞞鞞
等物並不得用鍍金
一會典載軍民僧道人等服飾器用俱有定制若常服常
服則禁僭用錦綺綉繡器物用戲金描金酒器全用
不用禁件金銀及將大紅銷金製為幔帳被褥之類婦女僭

用金繡閃色衣服金寶首飾獨釧無鑲寶石及用
珍珠綠飾衣服併結成補子蓋額纓絡等件事發俱照律
治罪服飾器用等物並追入官坐家課
一會典載庶民男女衣服並不得僭用金繡許用綾羅綢
絹素紗婦人金首飾一件金耳環一對餘止用銀翠不得
製造花樣金線雜飾
右冠服規條臣等謹按朱子全書云後人於禮日益疏略
不若就今人所行禮中刪修合有節文制數等威足矣考
諸通禮冠服之制附於五禮之末所以辨等威者莫大乎
是今人習尚奢侈矜為詭異隸卒倡優之徒服色踰制商
賈市僧之伍車馬無等庶人之妻珠玉相耀幼穉之子羅
綺是珍曾經禁約全不遵行即如宴會一節務求珍錯以
相徵逐酒饌之費數倍於昔上行下效俗做風媮職此之
由至婦女服飾宜從儉樸如有踰越等威者罪坐家長

咸豐九年

皇帝詔曰朕丕纘

鴻圖誕膺

寶命仰荷

上蒼篤眷

訓典四

列聖詒謀臨御以來於今十載萬幾兢業百爾欽承開言路以達聰舉賢才以輔治勵一心之寅畏戒三事之因循在宥羣生遇偏災而頻蠲正賦勤求上理斷疑獄而益慎祥刑乃日敬之衷常存夙夜而時雍之化未徧寰區命將專征秉大公以行賞罰養兵籌餉出左藏以拯黎元勞旋師於畿南早聞奏凱試師于江上遲觀銷兵飛鴻未變夫好音啓雁難期其安集披章宵旰決策焦勞今歲六月令辰為朕三旬慶節方冰淵之自惕奚岡阜之侈陳惟念臣民共效龔軒允宜中外覃敷膏澤既先開夫蓋榜嘉惠儒林更特沛夫綸章推恩寰海乘春錫福予一人上迓

天庥率土臚歡俾萬姓同登壽萬所有應行事宜開列於後

一五嶽四瀆等祀應遣官致祭者著察例開行

歷代帝王陵寢

先師孔子闕里應遣官致祭者著察例舉行

- 一自王以下至入八分公俱加紀錄四次
- 一宗室覺羅俱賞養贍銀一月
- 一滿漢大臣年六十以上者俱加紀錄二次
- 一內外滿漢文武各官俱加一級
- 一內外大小各官除各以現在品級已得封贈外凡升級及改任者著照新銜封贈
- 一國子監貢監生及各官學教習免坐監期一月
- 一各省儒學以正貢作恩貢以次貢作歲貢
- 一滿漢孝子順孫義夫節婦該管官細加諮訪確具事

實奏交禮部核實旌表

一八旗滿洲蒙古漢軍兵丁及內札薩克喀爾喀等蒙古年七十八九十九以上者分別賞賚至百歲者題明旌表

一軍民年七十以上者許一子侍養免其雜派差役八十以上者給與絹一疋綿一斤米一石肉十斤九十以上者倍之至百歲者題明旌表

一直省有坍沒田地其虛糧仍相沿追納者該地方官查明咨部奏請豁免

一從前各省偏災地方所有借給貧民籽種口糧牛具等項查明實係力不能完者著予豁免

一各處養濟院所有鰥寡孤獨及殘疾無告之人有司

留心以時養贍毋致失所

一內外官員有因公誣誤降革留任者該部查明奏請開復

一各省軍流以下人犯俱著減等發落

一各省監禁人犯著將上年秋朝審緩決至三次各犯仍照節次查辦之例查明所犯情節分別減等發落其緩決一二次人犯內有案情本輕可予矜原者亦著該部查明請旨定奪

於戲物阜年康雨暘若而撫時茂對定功保大民人宜而受祿延釐布告天下咸使聞知

咸豐十一年

上諭勞崇光奏鹽務緝私緊要請在隘口設立排船一摺廣

東鹽務積疲日久私販充斥以致官引滯銷鹽課征收短絀江北一帶梟匪聯幫販私持械拒捕大爲鹽務之害着照所請所有清遠縣屬白廟廠地方卽添設排船製備鎗炮編列字號發給兵役遇有大夥梟匪執持火器軍械抗拒卽格殺勿論如零星私販並未拒捕卽照常緝拿不得概行施放並着勞崇光遴委公正大員前往常川駐扎幫同緝私員弁兵役嚴密查緝認真辦理以肅鹽綱

咸豐十一年

上諭我朝深仁厚澤浹寰區軫念民依無微不至偶遇水旱偏災疆臣入告無不立沛恩施其被賊擾害地方小民蕩析離居情形尤慘各該省督撫大吏自能仰體朝廷子惠痼瘼之隱隨時查勘分別奏請蠲緩惟奸滑吏胥從中舞弊往往恩詔雖頒有遲至數月而始張貼有先期徵錢糧而後張貼者在國家屢頒寬大之恩閭閻仍難沐纖毫之惠屯膏壅澤皆不肖有司階之厲嗣後遇有蠲緩恩旨該省督撫當卽趕緊刊刻謄黃嚴飭各州縣隨時隨貼務使實惠均霑家喻戶曉如或有視同具文及任意壓擱致令朝廷澤不下逮一經發覺朕必重治其罪以爲玩視民瘼者戒

咸豐十一年

皇帝詔曰朕蒙

皇考宣宗成皇帝疇育仁慈恩勤付託臨御之初仰承

聖諭諄諄以敬

天法

祖勤政愛民奉三無私保泰持盈爲本因命中外臣僚薦舉

人材並廣開言路俾大小臣工各抒所見以期博採周知下情罔隱自御極至今日理萬幾凡披覽章奏引對臣工十一年中未嘗一日稍懈各直省水旱偏災經各該督撫奏請蠲緩錢糧靡不體卹民艱恩施沛惟自軍興以來已閱十載其竄踞連鎮馮官屯及楚閩粵黔巨股各匪雖經迭次削平而江蘇安徽浙江等省被擾各區迄今尙未戡定每念我黎民迭遭兵燹宵旰焦勞難安寢饋遂致思慮傷神漸形氣弱上年八月間舉行秋獮駐蹕熱河旋經總理各國事務衙門王大臣等將各國通商事宜妥爲經理都城內外安謐如常本年正月曾經降旨於春仲回鑾適因舊疾復作不得已降旨停止本擬俟秋間氣體復元啟蹕回京與諸王大臣講求庶政次第舉行孰意入夏以來暑瀉日久元氣愈虧以致彌

留不起豈非天乎顧念神器至重允宜傳付元良十六日子刻召見宗人府宗令右宗正御前大臣軍機大臣令其承寫硃諭立皇長子載瀄爲皇太子並命該王大臣等盡心輔弼贊襄政務皇太子仁孝聰明必能欽承付託其卽皇帝位以嗣大統書曰在知人在安民方今東南諸省軍務未平百姓蕩析離居慘罹鋒鏑振文教修武備登進賢良蕩平羣醜實爲當務之急可不勉哉隨扈王大臣及在京王大臣等其各精白乃心和衷共濟以期克臻上理各路統兵大臣及各該省將軍督撫受朕厚恩尤宜力圖掃蕩早靖逆氛俾寰宇奠安黎民綏輯克終朕未竟之志在天之靈庶幾稍慰焉喪服仍二十七日而除布告天下咸使聞知

咸豐十一年

皇帝詔曰我大清仰承

上天眷佑粵自

太祖

太宗肇建鴻業

世祖統一寰區

聖祖

世宗

高宗

仁宗

宣宗重熙累洽中外乂安我

皇考文宗顯皇帝臨御十有一年宵旰憂勤日臻上理盛德

豐功昭垂萬世

深恩厚澤漸被八紘方期撫綏寰海多福永膺詎意

臨幸灤陽舊疾復作元氣日虧竟至彌留不起七月十六日

子刻

諭立朕為皇太子十七日寅刻

龍馭遽升以神器屬於藐躬朕自惟沖齡薄德懼不克勝顧

念

列聖詒謀之要

皇考付託之隆勉抑哀忱膺茲重寄恪遵

成命於十月初九日祇告

天

地

宗廟

社稷即皇帝位以明年為同治元年仰紹前猷彌增寅惕際新綸之不布衍景運於無疆所有應行事宜條列於左

- 一在京在外諸王以下至公等以上俱加恩賜
- 一內外自公主以下至格格各加恩賜
- 一內外滿漢文武大小官員俱加一級
- 一內外大小各官除各以現在品級已得封贈外凡升級及改任者著照新銜封贈
- 一文官在京四品以上在外三品以上武官在京在外二品以上照現任品級各廕一子入監讀書
- 一內外文職自四品以下武職自三品以下降革留任及任俸罰俸處分准其開復

- 一會試額數俟禮部臨期奏明人數請旨酌量廣額鄉試大省加三十名次省加二十名小省加十名滿洲蒙古加六名漢軍加三名
- 一各直省入學額數大學加七名中學加五名小學加三名
- 一國子監貢監生及各官學教習免坐監一月
- 一各直省儒學無論府州縣衛俱於本年以正貢作恩貢次貢作歲貢
- 一每府州縣衛各舉孝廉方正暫賜以六品頂戴榮身以備詔用務期採訪真確毋得濫舉

歷代帝王陵寢

孔子闕里及五岳四瀆等祀應遣官致祭者照舊例行

一官吏兵民人等有犯除謀反叛逆子孫謀殺祖父母父母內亂妻妾殺夫奴婢殺家長一家非死罪三人採生折割人謀殺故殺真正人命蠱毒魘魅毒藥殺人強盜妖言十惡等真正死罪不赦外軍務獲罪隱匿逃人亦不赦外其餘自咸豐十一年十月初九日以前已發覺未發覺已結未結者咸赦除之有以赦前事告訐者以其罪罪之

一各省軍流人犯查明到配三年實在安靜守法及年逾七十者釋放回籍

一各處盜賊或為飢寒所累或為貪官所迫實有可憫如能改過就撫者准赦其罪

一各旗籍內務府及五旗包衣人等凡侵貪挪移一切賠罰應追銀兩實係本人家產盡絕者查明准予豁免其分賠代賠以及牽連着賠者一概豁免

一凡官員因公賠罰等項而其子孫又代祖父着賠者查明豁免

一旗營官兵有因出征及被災借支俸餉者免其扣還

一滿漢兵丁有曾經効力行間因被傷年老閒住者除例得優卹外查明酌加恩賚

一歷年驛站軍興甚屬勞苦着各省督撫加意撫卹

一各直省有同堂五世及親見七代者除例賞匾額外查明各加恩賚

一天下之本農為重各府州縣衛果有勤於耕種務本

力作者地方官不時加獎以示鼓勵

一除五旗包衣佐領下披甲人等不賞外八旗滿洲蒙古漢軍護軍披甲人礮手步軍各賞一月錢糧

一軍民年七十以上者許一丁侍養免其雜派差役八十以上者給與九品頂戴九十以上者給與八品頂戴百歲以上者給與七品頂戴一百二十歲以上者給與六品頂戴百歲至一百二十歲以上者均仍題明給與建坊銀兩

一各處養濟院所有鰥寡孤獨及殘疾無告之人有司留心以時養贍無致失所

於戲觀光揚烈敢稍寬繼述之心錫類推恩期共慰隆平之望諸王文武大小臣工其各矢忠誠贊襄郵治以垂我國家

萬年有道之麻布告天下咸使聞知

咸豐十一年

上諭朕奉

母后皇太后

聖母皇太后懿旨現在一切政務均蒙兩宮

皇太后躬親裁決諭令議政王軍機大臣遵行惟繕擬諭旨仍應作為朕意宣示中外自宜欽遵

慈訓嗣後議政王軍機大臣繕議諭旨著仍書朕字將此通諭中外知之

咸豐十一年

上諭據少詹事許彭壽奏請清理庶獄及御史林壽圖奏行寬政以培元氣並聲明戶部五字鈔票各案株連太多各一

摺所奏甚是朕已於登極詔內將一切情有可原者悉行赦除矣我國家以忠厚開基

列聖闡澤覃敷

恩齊覆幬

皇考大行皇帝尤明慎折獄是以

御極十餘年屢頒肆赦之條卽如許彭壽林壽圖所稱戶部五字鈔票內案波及至數百人繫獄至兩三載深可矜憫此案從前載垣等意存羅織藉作威福遂至鍛鍊周內連累多人當此政令維新之日自應速爲清理所有此案內監禁之官員商民人等均着該部詳審案情迅速議結其應行省釋者卽予省釋如有冤抑者速爲昭雪總期毋縱毋枉悉爲平允至於閭閻小民無知犯法爲民上者方且矜恤之不暇乃

嚴酷有司率以苛刻爲稱職至捕風捉影罪及無辜朕哀矜庶獄良用惻然著內外大小問刑衙門詳悉查明概行清釐卽有案內要證不得不逮繫者亦卽將案情趕緊審結不准任意拖延累及良民庶敦寬大之風用副協中之治將此通諭內外問刑衙門知之

咸豐十一年

上諭御史朱潮奏請嚴查劣員以肅吏治一摺從來求治必先擇吏救時首在愛民乃近來不肖官吏蠹國殃民爲害百姓實非一端卽如勸捐一事國家不得已而借資民力而官吏視爲利藪未充公府先飽私囊設局抽釐尤恃其無從查核重徵併計甚或大吏知情故縱上下分肥以致層層剝削民不聊生至於民間詞訟差役勒索不一而足兩造廢時守

候延不審理案牘塵封或聽受請託懸而不結上司亦漫無覺察甚至刑獄濫施胥役門丁百端凌虐屬在小民無從呼籲各省貪酷庸劣之員大吏或於初到任時叅劾數員以示風厲久而情面習熟通同一氣重案代爲消弭絕少彈章積習相沿殊堪痛恨此後各督撫大吏務宜激發天良力除徇庇所屬如有虐民贖貨之員隨時叅奏如不自叅劾別經發覺朕惟該管上司是問至私拜師生最爲仕宦惡習其風開於都下而盛行於外省地方官鑽營上司詭遇求合及近來投劾軍營者夤緣優保皆必先拜師生以爲進身地步尤干例禁嗣後務當砥礪廉隅各知自愛如有仍前惡習必當予以重懲勿謂言之不豫也

咸豐十一年

上諭給事中高延祐奏嚴懲貪墨簡任賢良並請飭議政王軍機大臣訪求俊乂以備簡用一摺用人行政之本封疆大吏將帥重臣果能潔己率屬則牧令咸得其人士卒樂爲效命自能保衛吾民共臻平治若如該給事中所奏近來大吏以州縣爲利藪升調補署非錢不行州縣得缺之後勢必取償於民於是苞苴公行是非倒置卽有賢員亦以朝委暮撤此調彼署不能竟其設施其納賄徇私踪跡每多詭秘卽或發覺奉旨查辦復以官官相護巧爲開脫至於軍營保舉亦有賄求惟賂秉章會國藩等於吏治軍政俱能使人激勸等語所奏均切中近時情弊似此賄賂公行相率效尤風俗頹靡伊於胡底嗣後凡各直省州縣等官除升遷遇有事故及人地實在相需之缺方可派員署理其實缺人員一經到任

以後但能循良供職應令久於其任竟其所長毋得率行更調至軍營將士冲鋒冒敵尤宜賞罰公平用命嗣後各路統兵大臣於著有勞績各員務當秉公保奏其有巧於鑽營不惜廉恥者概不得濫登薦牘庶使人思興奮軍務得有起色總之直省督撫及統兵大臣責任均屬重大但得品學端方通達政體者分任其事則上行下效僚屬等自必滌慮洗心不敢夤緣干進朕深居九重於內外臣工賢否尙未周知惟在議政王軍機大臣等虛心延訪留意真才爾在廷諸臣亦共矢公忠弼於治庶羣策兼收百廢俱舉朕實有厚望焉
番禺金錫齡分纂 番禺金佑基初校 番禺史悠履再校
番禺金俊基三校 番禺史悠泰四校

廣州府志卷四終

廣州府志卷五

訓典五

同治元年

皇帝詔曰朕惟古帝王膺圖建極嗣服綏猷稟懿訓於蕙幃熙洪稱於芝檢粵稽祥開虞祚媿溯英皇化起周京譽推任姒載觀往籍聿著前型欽惟

母后皇太后

道贊乾元

德符坤厚

播徽音於海宇

表淑則於宮闈

聖母皇太后

性備中和

教成雖穆篤

深仁而衍緒本

至善以詒謀作配

重華

九陛合二儀之撰蒙庥累葉

兩宮徵一德之孚

績懋垂簾心勞鳳展禮崇繅繭

躬詣蠶壇逮下則葛藟興思奉

先則蘋蘩致敬

綜古今之治理金鑑求書

屏服御之奢華練衣示範允符地道克代

天工丕基奠若苞桑永祚綿夫瓜瓞龐鴻翊運贊

帝治者十一年昌燕延釐式

母儀者千百國朕渥沐

隆恩於教育虔循茂矩以推崇

瑤妃騰芳休徵有象

彤編絢彩介福無疆仰

覆幬之宏施

慈輝普被合尊親而並戴

令聞昭宣諮議僉同典章具備祇告

天

地

宗廟

社稷於同治元年四月二十五日率諸王貝勒文武羣臣謹

奉

冊

寶恭上

母后皇太后尊號曰

慈安皇太后恭上

聖母皇太后尊號曰

慈禧皇太后臣庶之懽心莫罄溘陬之闔澤均霑所有事宜開列於後

- 一在內親王之福晉以下公之妻以上著加恩賜
- 一外藩蒙古諸王之福晉以下公之妻以上著加恩賜
- 一民公侯伯以下二品大臣以上命婦著加恩賜

一從前尙過公主格格之額駙等照伊等品級著加恩賜

封典

- 一從前恩詔後升職加銜補官者悉照現在職銜給與
- 一在京文官四品以上武官三品以上著各加一級
- 一在京王公文武官員任內有降級罰俸住俸者咸與開復又在京官員現在議降議罰者悉予豁免
- 一除十惡不赦外犯法婦人盡行赦免
- 一太監等著賞給一月錢糧
- 一上三旗辛者庫當差婦人著酌議賞賜
- 一罰贖積穀原以備賑冬月嚴寒鰥寡孤獨貧民無以為生著直省各督撫令有司務將積穀酌量賑濟毋

令奸民假冒支領

一各處効力贖罪人員向無定限多致苦累殊堪矜憫著各該管官查係已滿二年者聲明犯罪緣由奏請酌量寬免

於戲惠敷蘭掖貽萬民康阜之庥瑞集蘿圖啟百世熾昌之運布告天下咸使聞知

同治元年

上諭前因通政司參議彭祖賢奏請疏通粵鹽當令戶部議奏茲據奏稱廣東鹽務改引用票是否確有實效請飭各該督撫酌核辦理等語著劉長佑查明該參議所奏會同廣西湖南江西福建貴州各督撫酌核奏明辦理至廣東自道光三十年起至咸豐七年止省河等處欠完正課及分限帶征銀兩至今均未完報該省河潮橋各商歷年積欠帑本息銀及未完正鹽場羨等項應如何征完之處並未據報部核辦咸豐八九等年引課奏銷亦未據造報實屬疲玩已極著劉長佑嚴飭該運使將前項未完各款並八九等年引課催完趕辦奏銷倘再遲延卽著該部指名嚴參

同治元年

上諭御史裘德俊奏牧令宜加體察等語所奏甚是州縣爲親民之官地方利弊民生疾苦全賴州縣之區畫方足以蘇民困而清吏治該州縣等均朝廷命官豈竟不知自愛甘犯貪污乃朝廷時加訪察而循良廉潔之吏仍少概見豈該州縣盡無天良不知愧奮總由宿弊未除欲勉爲廉潔而無由甚可憫念裘德俊所稱州縣命盜錢糧之解費差使節壽之

應酬需用浩煩養廉既已攤扣耗羨又復歸公勢必取諸民間均係實在情形自應悉行裁革俾州縣得以從容展布不致擾累小民從前湖北巡撫胡林翼裁革州縣一切浮費故吏治蒸蒸日上近日兩江總督曾國藩江西巡撫沈葆楨請裁革江西攤扣各款以清弊源洵能仰體朝廷澄清吏治之意實心辦理各直省自宜仿照舉行嗣後州縣解費應酬等項均着永遠革除欵差兵差照例供應外其餘過往差使以及本省上司一概不准應酬違者以違制論其攤扣各款應如何酌量裁減並著妥爲辦理具奏各直省大吏受恩優渥正可藉此自勵廉隅而州縣中稍知自愛者亦可勉爲循良以備朝廷任使倘仍敢肆行貪污必當按贓從嚴治罪經此次訓諭後各直省大吏務當實力奉行勒限一年妥爲辦理倘別經發覺或經訪聞仍有收受節壽需索解費等弊必將該上司從重懲處毋謂言之不預也將此通諭知之

同治元年

上諭國家愛養小民常賦之外從無苛派近因各路用兵直省紳民感朝廷二百餘年厚澤深仁捐輸軍餉踴躍爭先雖地方被賊蹂躪而該紳民等仍復樂輸恐後敵愾同仇深堪嘉尚在該紳民等尊君親上原不希冀恩澤而朝廷藉資民力必當立予獎敘以酬其報效之忱近來各省民間繳捐因大吏陞遷無定一經交卸卽置高閣接任之地方官漫不經心不復催辦以致獎勵虛懸是小民急公奉上而地方官不以上聞何以鼓民心而昭激勸且地方大吏受恩優渥倘有捐輸軍餉無不仰邀恩澤並有移獎子弟者而小民轉致向

嗚殊失事理之平著各路統兵大臣及直省督撫遇有紳民捐輸軍餉者隨時分案奏請交部獎勵其前次已捐未經請獎之紳民等並著督飭委員迅速查明核給獎敘毋稍稽延

同治元年

上諭光祿寺卿潘祖蔭奏請飭地方官掩埋暴骨等語國家掩骨埋骸原有成例並於恩詔條款迭次頒行茲據所奏軍興以來地方迭遭兵燹百姓慘罹鋒鏑往往村落爲墟以致白骨埋渠日久暴露深可憫念著各督撫於被兵地方飭令各州縣隨時妥爲掩埋以示矜卹

同治元年

上諭自來儲才養士必視學校爲盛衰我朝列聖相承庠序修明敦崇實學

皇考文宗顯皇帝御極之初卽命生童就試者兼習性理等書原冀其趨向一端則學術自立以收化民成俗之效乃近來各直省教職等官並不實力奉行認真訓課惟知索取贄禮修儀貪得無厭又其甚者往往干預地方公事並或遇事魚肉士子詔諛紳富又安望其經明行修足爲士林表率耶嗣後各省學政務當整躬率屬督飭各教官讀書立品毋爲士子所輕平時訓導諸生總以躬行實踐爲歸勿崇尚浮華勿虛應故事其稱職者准各學政會同督撫隨時保奏給予獎勵如有闕冗充數及少年浮動不克奉職者並著隨時甄劾不必待至大計年分庶人知自愛爭自濯磨並飭各教官分日於各該城鄉市鎮設立公所宣講

聖諭務使愚頑感化經正民興正學昌明人才蔚起實有厚

望焉

同治二年

上諭國家愛育黎元體恤商民從無苛派之事近因軍餉浩繁設局抽釐乃朝廷萬不得已之舉迭經明降諭旨嚴禁擾累並於上年因御史丁紹周條陳江北釐捐積弊請裁革委員以節浮費復經通諭各直省督撫於釐捐委員概行裁革統歸地方官經理按月申報實數由該管督撫按照例限報部並照部定章程酌定簡明條款分晰開載榜示通衢以昭核實乃昨據富明阿奏稱親赴裡下河一帶南北糧臺設立捐卡約有百餘處有一處而設數卡者有一卡而分數局者委員既繁局費尤濫每月局用少者二百金多者至千餘金委員嚴貌等貪鄙不職因降旨將嚴貌等革職以示懲儆而

吳棠於奉旨後迄今數月並未遵照辦理該署漕督受恩至渥尙復如此瞻徇甚負委任著傳旨嚴行申飭卽著歸併裁革以清積弊因思江北如此他省可知聞地方不肖紳士往往夤緣入局百端侵漁商賈不勝其擾而軍餉仍無裨益卽如上海一隅之地各貨分設一局委員多至數十人是以朝廷不得已之舉爲不肖委員紳士分肥之地利歸於下怨斂於上亦安用此釐局爲耶著再行通諭各直省督撫恪遵前旨將各釐局酌量歸併裁革劣員派委賢能地方官經理毋得以不肖官紳充數倘仍前瞻徇濫行派委別經發覺或被科道奏必將該督撫等從嚴懲處毋謂不戒視成也

同治三年

上諭爲政之要首在足食各直省州縣設立常平社倉國家

承平留以備凶荒之用一旦有事恃以爲緩急之需所以爲未雨綢繆之計者法至善也近來軍務繁興寇盜所至地方每以糧盡被陷推原其故總由各州縣恣意侵挪任令米粟空虛遇變無所倚賴或又聞驚逃遁齎敵以糧以致守禦無資生民塗炭興言及此罪有攸歸嗣後各省常平社倉責成督撫大吏認真整頓廢者復之缺者補之隨時稽查凡官倉未動之穀不得變價提用至於倉穀已缺紳民捐資彌補尤應加意保全務使各倉穀豐盈以期有備無患此旨著該部迅卽通行各省卽著各該督撫將各州縣倉儲實存若干有無虧缺查明據實覆奏倘復因循玩忽聽州縣侵漁虧缺定將該上司及州縣一併從重懲處用副朝廷貴粟重農之意

同治三年

上諭戶部奏蠲免錢糧已輸在官准流抵次年應完正賦則例所載防弊本極周詳無如各州縣積習相沿機詐百出或停擱蠲免詔旨先期催追或藉無流抵明文闕入私橐卽或業戶中偶請示遵而官吏胥差互相聯絡游詞飾說巧爲欺朦倚勢作威肆其侵蝕故遇免征之年追呼不已已輸之賦扣抵無期是以歷屆蠲免難霑實惠卽如本年四月蠲免江屬諭旨有流抵字樣正月初二日蠲免蘇屬諭旨無流抵字樣載與不載厥例維均恐小民無知或啟猜疑之竇官吏藉端影射巧索強取請申明定例嚴防弊端等語向來蠲免省分其全年捐免先期輸官者准其流抵次年應完正賦其蠲免定有分數先期全輸在官者除應徵分數外餘應蠲免分數亦准下年扣抵立法至周乃近來不肖官吏因緣爲奸致

小民踴躍輸將反飽貪殘囊橐上行其惠下屯其膏喪心昧良莫此為甚嗣後各省官吏如有隱匿贍黃朦混流抵各項弊端著各該省督撫大吏查明嚴參按照侵盜錢糧律治罪並著刊刻謄黃徧行曉諭以後遇有蠲免年分著將此旨一併刊刻宣示仍著戶部查照從前例案通行各直省以期實惠及民無資中飽將此通諭知之

同治四年

上諭御史賈鐸奏請申明講約舊例以正人心一摺我朝雍正年間頒發

聖諭廣訓通飭各直省地方官於每月朔望剴切宣講務使鄉曲愚民咸知向善列

聖相承諄諄誥誡不啻再三朕御極之初亦經宣諭中外實力奉行毋得虛應故事乃如該御史所奏近來州縣官藐視舊章實不知講約為何事以致人心風俗敗壞滋深不但鄉里小民日趨邪僻竟有身列膠庠忝然四民之秀亦竟離經畔道而肆無忌憚此世道人心所關匪細亟應申明舊例以示率從著順天府五城及各省督撫大吏嚴飭所屬地方官選擇鄉約於每月朔望齊赴公所敬將

聖諭廣訓各條剴切宣示其距城較遠各鄉卽著地方官選擇品行端正紳耆設立公所按期宣講仍由該地方官隨時考察毋得日久玩生教諭訓導等官課士而外惟當與諸生講論孔孟之道以砥礪其身心其各省學政按臨處所亦當督同學官隨時闡揚正教認真開導俾士民各端趨向有所遵循倘有地方州縣及各學教官虛應故事奉行不力卽由

該管督撫學政據實參處以維風化而振愚蒙

同治四年

上諭前因雨澤愆期諭令京外問刑各衙門清釐庶獄以消
積戾茲據給事中劉毓楠奏各省株連無辜人證應迅結省
釋並各州縣應行解省要犯不得任意遲延各等語各省京
控案件凡發交各該督撫藩臬提訊者均應提省研鞠以昭
慎重惟案內干連人證往往有無辜之輩或緣事牽涉或被
原告挾仇誣指一經傳案胥役訛索百端甚至到省羈押動
經數年延不訊結死亡相繼無可控告實堪矜憫總由各該
省積習相沿視京控為無關緊要案件漠不關心各州縣於
應解要犯反因差役賄賣捏病藉故延不起程轉致無辜干
證先期羈省冤抑莫伸殊堪痛恨嗣後各省督撫於京控案

件仍責成臬司親提訊問各省首府發審之案務令嚴定限
期隨到隨結無干人證立予省釋不得任性積壓濫行拖累
無辜州縣應行解省要犯不准託故耽延倘查有案經數年
任意延宕及州縣解犯遲延者即著該管上司從嚴參辦以
清案牘而重人命

同治四年

上諭前因御史賈鐸奏請申明講約舊例以正人心降旨令
順天府五城及各省督撫飭屬選擇鄉約於每月朔望敬將
聖諭廣訓五條剴切宣示茲據御史張盛藻奏稱前在湖北
本藉時常聞城鄉士民多以講約為名斂錢聚眾燒香結盟
請飭嚴禁等語朝廷申明講約舊例原期闡明正學藉以維
風化而振愚蒙若如該御史所奏各情是不肖匪徒轉得藉

講約以售其離經畔道肆無忌憚之術於風俗人心大有關繫且此等流弊尙恐不止湖北一省爲然著順天府五城及各省督撫於申明講約舊例時嚴密稽查如有異端邪說及一切斂錢聚眾燒香結盟等事卽著嚴行懲辦以示杜漸防微至意

同治四年

上諭御史胡毓筠奏吏治漸就廢弛請申諭中外臣工力求實踐一摺近因軍務未竣時事多艱屢經諭令中外臣工於應行應革諸政實力奉行以期漸臻上理數年之中實心任事著有成效者固不乏人而積弊仍未盡除措施仍未盡善總緣狃於積習因循不振致良法美意皆隔碍不行行者亦多虛應故事玩愒日深弊將胡底亟應力加整頓以肅紀綱

著再申諭中外臣工嗣後於特旨通諭之件並諸臣奏准應行應革各事宜務當督率所屬認真興辦期於國計民生實有裨益毋再稍涉因循致滋流弊以副朝廷勤求治理至意

同治四年

上諭羅惇衍奏州縣擅用非刑請飭禁止等語向來州縣各官妄設刑械及私立班館等弊例有明禁乃近來州縣於刑法之外往往私用非刑獲犯到案肆意拷撲橫加酷虐卽偷竊小犯亦或立斃杖下殊失刑期無刑辟以止辟之道著各直省總督嚴飭所屬各州縣於詰姦禁暴之中仍宜存心矜恤凡妄設刑械及私立班館等弊務卽嚴行禁止不得任意殘酷以刻爲能致令民不堪命用副朝廷明慎用刑至意

同治五年

上諭給事中劉毓楠奏窮民失業請飭妥為撫恤等語各直省府廳州縣向設有養濟院棲流所等名目俾無告窮民不致流離失所近來地方官未能實力奉行以致窮黎困苦顛連情殊可憫著各直省督撫嚴飭所屬將養濟院棲流所留養局舊址隨時修葺遇有老弱失業窮民給予口糧安置該地方官務當督同公正紳董妥為經理不得假手吏胥致滋弊竇用示朝廷矜恤窮困至意

同治五年

上諭翰林院檢討董文煥奏吏治廢弛請飭內外臣工講求律例以資整頓一摺律例有關政治庶司百職平日均應加意講求精思熟習乃近來內外臣工於律例漫不經心以致劣幕奸胥得以把持朦蔽吏治廢弛率由於此著各部院堂

官於學習人員奏留時考以本部則例條對詳明者方准奏留如不能諳習或咨回本部或再留學習三年由該堂官隨時酌定其外省試用人員亦著該督撫於期滿時考以大清律例察其能否熟習分別煩簡補用其不曉律意文理荒謬者即著從嚴甄劾毋稍徇隱經此次嚴諭之後內外大臣務須通飭所屬各員平日講明律例於公事詳細剖決毋得假手吏胥幕友任意顛倒以除積弊而整紀綱將此通諭知之

同治五年

上諭羅惇衍奏請飭士民速葬親柩等語子孫久淹親柩不葬本干例禁近年習俗相沿或因拘泥風水或因貧窘乏資遂將親柩停留久不安葬問心其何以安著各該省督撫飭令所屬各州縣廣為勸諭務使士民咸知速葬之義不得藉

故淹留致干罪戾至軍務被擾地方屍骸暴露尤堪憫惻前
會諭令各省隨時掩埋仍著實力奉行並飭令各地方官與
該處紳民將叢塚義莊酌量興辦

同治五年

上諭前據戶部議覆左宗棠奏粵海關稅收銀數與該關奏
報懸殊請飭該督撫查明辦理一摺當經諭令瑞麟等查議
具奏茲據瑞麟蔣益澧奏稱粵海關收稅事宜從前曾改隸
將軍督撫等官經理自乾隆十五年始專設監督著為成例
未易輕議更張至該關額征總數從前貨物歸併一口不及
九十萬兩而近來五口通商每年征稅猶及百萬兩但能嚴
查偷漏隱匿等弊稅務自可日有起色體察目前事勢似不
必改由督撫辦理等語所奏自係實在情形粵海關稅務較

繁該監督特膺簡任宜何如激發天良力圖報効乃家丁朦
蔽書吏侵吞積弊相沿較他處為尤甚若不極力整頓涓滴
歸公稅課安有起色著該監督嚴行鈐束力禁侵漁查明各
口收數核實清釐不得稍有隱漏並著該省督撫隨時明查
暗訪如仍有書吏家丁通同舞弊該監督以多報少情事即
著據實嚴參從重懲辦此外各關監督及兼管關稅之督撫
均須認真稽核釐剔弊竇毋得仍蹈從前積習稍涉含混

同治五年

上諭御史朱鎮奏廣東沿海州縣每於海潮退後水涸成灘
名曰沙地紳衿據為私產地方官不敢過問請飭清查丈量
以裕國賦而免侵漁等語著兩廣總督廣東巡撫嚴飭沿海
各州縣將此項沙地認真丈量悉數造冊計畝升科毋任該

紳等壟斷弊混其州縣各員果能辦理妥善并准其仿照近畿辦理黑地章程奏請獎敘

同治五年

上諭御史夏獻馨奏各省書役舞弊地方官有明知受其朦蔽反代為掩飾迴護者並有恃為腹心爪牙者該書役人等或舞文玩法或私拷示威或叅比奸匪或科斂民錢弊端百出請嚴剔衙蠹以除民害等語著各直省督撫府尹嚴飭所屬認真稽察如查有前項各弊即將書役從重懲辦倘該州縣等官縱容徇弊即著該督撫府尹等查明從嚴參處所有各州縣書吏衙役除增額貼寫及帮役外不准任意增添並將掛名替身書役名目一併嚴查禁革以清弊源而肅吏治

同治六年

上諭瑞麟蔣益澧奏裁減廣州府屬征收米折酌定銀數一摺廣東廣州府屬十四縣征收色米價銀前經諭令該督撫覈實裁減酌議章程具奏茲據奏稱擬自同治六年正月初一日始南海番禺二縣每民米一石連耗折征銀五兩八錢香山新會順德龍門四縣每民米一石連耗折征銀五兩五錢花縣增城三水清遠四縣每民米一石連耗折征銀五兩東莞新安從化新甯四縣每民米一石連耗折征銀四兩八錢此外不准絲毫浮折通計廣州府屬十四縣每年減征銀一十六萬五千四百餘兩著照所請由該督撫等出示通行勒石永遠遵行經此次核減之後倘有不肖官吏巧立名目暗中增收或縱容書差苛索一經發覺即著嚴參按律懲辦此外各府屬所征色米是否有累於民應如何酌減之處並

著該督撫體察情形分別核議具奏餘著照所議辦理該部知道欽此

同治六年

上諭軍興以來逆匪到處裹脅小民畏死勉從情本可憫迨自拔來歸一經官吏訪拏或被仇人告發即加以從逆之罪是被脅之人非死於賊即死於法奚以為反正者勸著各直省督撫轉飭臬司及各府州縣遇有此等案件除著名首要各犯甘心從逆仍當盡法懲治外如訊明實係被脅人犯悔罪復業別無不法情事即行釋放毋得任意株累並著各路統兵大臣出示曉諭凡身陷賊中者既經投誠概免治罪即派員解交本籍地方官妥為撫恤毋令失所以示國家軫念民生法外施仁之至意

同治六年

上諭從來致治之道必先祛除壅蔽未有實事求是而治不臻上理者也近來各省大吏認真辦事者固不乏人而民情吏治未能將實在情形真切詳稱者在所不免徇私枉法更難保其必無至各路統兵大員捏報勝仗鋪張賊情濫保屬員虛開勇數相率效尤竟成積習其在京各衙門堂司各官循例供職苟且因循言官撫拾細故無裨實政中外如此何以救時艱而召天和夙夜焦思彌深悚懼嗣後內外文武諸臣務當振刷精神痛除舊習毋得仍前泄泄以副朝廷實事求是之誠於諸臣有厚望焉

同治六年

上諭給事中夏獻馨奏請設立義倉以裕民食一摺民生本

計足食為先歲之豐歉無常惟在平時預為籌備遇有偏災方足以資接濟向來各省州縣設立常平倉以外復設義倉原以廣積儲而備災荒立法本為至善自軍興以來地方被賊擾害舊有義倉每多廢棄亟應及早興復以備不虞著各直省督撫即飭所屬地方官申明舊制酌議章程勸諭紳民量力捐穀以各鄉村廣設義倉並擇公正紳耆妥為經理不准吏胥干預該督撫等務當實力奉行不得視為具文

同治七年

上諭御史游百川奏請崇尚經術以端趨向各摺片掄才原期士子通經致用若學無根柢徒恃懷挾倩代以圖僥倖所謂淹通經史者安在何以振文風而端士習學政歲科兩試生童正場之前例有考古一場著直省學政於按考各屬時徧諭生童如有能默誦五經通曉經義者准其報名即於考古場中按名面試拔之以為研經者勸其未經報考者亦認真習某經於下屆按冊試之該學政等務期崇尚實學拔取真才毋得視為具文以副朝廷樂育人才至意

同治九年

上諭御史宋邦德奏廣東積弊數端請仍飭嚴禁等語頂凶擄贖械鬪諸弊本干例禁若如該御史所奏廣東近來此等風氣仍所不免總由地方官平時遇事因循不能實力整頓以致刁民挾仇尋釁轉以無辜論抵良民被擄勒贖匪黨肆行無忌或以口角微嫌釀成巨案或以挖掘墳墓結訟經年種種惡習實為閭閻之害著該督撫剴切曉諭嚴行申禁並慎選廉明之吏隨時認真查辦如有前項弊端即行從嚴懲

治以挽頽風

同治九年

上諭鴻臚寺卿張緒楷奏天時亢旱請飭各省大吏力除積弊以迓和甘一摺本年近畿雨澤愆期天氣亢旱深宮循省焦慮時深各省大吏亦當仰體朝廷兢惕之心勤修民事以消殄戾而迓祥和卽如征收錢糧本有例限乃地方官每藉口軍餉緊急先期催征遇有水旱之災民力愈形拮据著各直省督撫申明舊例務令征按上下兩忙征收不得違例豫征以紓民困近因軍務未平各省釐金分別裁減酌留大宗以濟重餉原屬不得已之舉若各州縣私設釐卡藉端漁利實屬大干法紀著各該督撫將停止釐卡處所明白曉示以杜朦混其有地方劣紳假公濟私把持公事勒捐科派等弊並著嚴行查禁毋任擾害聞閭至各省京控等件有經年累月未經奏結者牽累多人羈禁無辜情尤可憫各該督撫務當破除情面認真整頓將未結各案速爲審結不得意存消弭日久拖延將此通諭知之

同治九年

上諭醇郡王奏瀝陳下情請振積習以濟大局一摺方今時事孔亟軍務未平籌餉徵兵重煩民力宵旰焦勞恆以自強不息爲念内外文武臣工均應力戒因循勉圖振作乃近來各直省督撫及統兵大臣實心任事者固不乏人而苟且偷安者亦復不少以致軍務未有了期吏治毫無起色在廷諸臣亦復泄沓成風未能力圖補救共挽時艱醇郡王賢親並著休戚相關讜論忠言與朝廷兢惕之心適相昭合嗣後內

外文武臣工其各振刷精神破除積習戎行何以整飭官方何以澄敘民生何以久安務當清白乃心實事求是俾庶政修明日臻上理用副誥誨至意

同治九年

上諭御史劉國光奏請飭嚴禁各關稅衙門留難需索等語前因丁日昌奏本年江蘇應試諸生闖關抗稅當經降旨嗣後鄉會試文武舉貢生監人等赴京赴省應試概不准包攬客貨私鹽等項原因不肖士子藉考漁利不得不嚴行查禁但恐吏役等假公濟私於該士子所過關津釐卡皆以查稅為名藉端訛詐指無為有需索不遂任意留難致令士子沿途節節阻滯貽誤場期殊失朝廷優待士林之意著各省督撫嚴諭各關卡官凡鄉會試文武舉貢生監等除有勾串牙商包攬客貨恃眾抗稅情事仍應查辦外其有照例隨帶衣箱食物等件者該吏役等不得任意留難如有需索情弊准該士子赴該管衙門呈訴將該吏役等從重懲辦如該管官有意袒護並著該督撫一併查參其尋常往來之人如無夾帶貨物亦應迅速放行不得藉端留難以安行旅

同治十年

上諭御史劉瑞祺奏請飭銷燬小說書板一摺坊本小說例禁綦嚴近來各省書肆竟敢違禁刊刻公然售賣於風俗人心殊有關繫亟應嚴行查禁著各直省督撫府尹飭屬查明應禁各書嚴切曉示將書板全行收燬不准再行編造刊印亦不得任聽吏胥借端搜查致涉騷擾

同治十年

上諭欽恤庶獄仁政為先溯查乾隆十一年嘉慶十一年道

光十一年均

特頒省刑

諭旨大沛

恩施亦越咸豐十一年

皇考文宗顯皇帝紹述

前徽復頒行

曠典朕臨御以來仰承兩宮

皇太后懿訓夙夜兢兢以愛育黎元為念茲當紀年開秩允

宜祇遵

成憲以示矜恤而迓祥和所有刑部及各省已經結案監禁

人犯除情罪重大及常赦所不原者毋庸查辦外其餘著大

學士會同刑部酌量案情輕重分別請旨減等發落軍流徒

杖以下人犯一併分晰減等完結俾霑寬大之恩用副朕子

惠兆民法外施仁至意

同治十一年

皇帝詔曰朕惟圖開紫極坤順與乾健同功曜合丹宸月恒

與日升並著粵稽往牒備溯前型瞻戴星軒表度於煌規娥

矩弼成風化徵祥於妣幄娥臺惟嘉德之助勦教行壺掖斯

休和之翔被頌浹家邦朕敬紹丕基誕膺景運茲者

慈安皇太后

慈禧皇太后特遴賢淑俾正宮廷欽遵

懿旨謹以告

天

地

宗廟於同治十一年九月十四日册立翰林院侍講崇綺之女阿魯特氏為皇后同勤尊養趨

萱殿而祝蕃釐勉嗣徽音式椒闈而敷內政慶成嘉禮覃洽恩施所有事宜開列於後

一親王福晉以下至奉恩將軍妻室等俱加恩賜

一民公侯伯以下二品大臣以上命婦俱加恩賜

一各直省民欠錢糧由戶部酌覈奏請蠲免

一八旗綠營兵丁賞給一月錢糧

一文武會試中額俟該部臨期奏明人數請旨酌量加

廣文武鄉試由該部分別大中小省分並滿蒙漢字

號奏請加額

一各直省儒學無論府州縣衛俱於本年以正貢作恩貢次貢作歲貢

一八旗滿洲蒙古漢軍婦人年七十以上者照例分別賞賚

一內務府三旗婦人年七十以上者照例分別賞賚

一各省老婦有孤貧殘疾無人養贍者該地方官加意

撫卹毋令失所

一除十惡及謀殺故殺不赦外犯法婦人盡予赦免

於戲應地安貞帝化重二南之始普天錫祐母儀合九有之

忱欽薄海之臚愉徧羣生而被澤布告天下咸使聞知

同治十一年

皇帝詔曰朕惟禮隆報本普天洽尊養之忱善則歸親薄海

重顯揚之義矧嘉禮慶成於蘭掖宜隆稱上晉夫萱幃爰溯
成規式彰巨典欽惟

慈安皇太后

俛天協慶

應地含章

普德教於六宮

沛恩膏於四海

慈禧皇太后

溫恭懋著

仁厚宣施

篤燕翼以詒庥

集鴻龐而受祉

垂簾敷政

兩宮昭

一德之孚

秉錄綏猷萬紀仰

重熙之盛茲復慎遴賢淑俾正宮廷

璇闈之愛景方長同伸潔養

瑤彤之春暉宜報祇奉

徽稱迺

慈懷過示夫謙摛惟朕意彌殷夫籲懇仰蒙

俞允爰舉上儀謹告

天

地

宗廟

社稷於同治十一年十月初八日率諸王貝勒文武羣臣恭

奉

冊

寶加上

慈安皇太后徽號曰

慈安端裕皇太后加上

慈禧皇太后徽號曰

慈禧端佑皇太后宮壺床凝聿重尊親之典寰瀛慶洽應推

錫類之恩所有事宜開列於後

一在內親王之福晉以下公之妻以上著加恩賜

一外藩蒙古諸王之福晉以下公之妻以上著加恩賜

一從前恩詔後升職加銜補官者悉照現在職銜給與

封典

一在京文官四品以上武官三品以上著各加一級

一在京王公文武官員任內有降級罰俸住俸者咸與

開復又在京官員現在議降議罰者悉予豁免

一外藩蒙古王公以下台吉以上有罰俸住俸者咸與

開復其現在議罰者悉予豁免

一除十惡不赦外犯法婦人盡行赦免

一民公侯伯以下二品大臣以上命婦著加恩賜

一從前尚過公主格格之額駙照伊等品級著加恩賜

一太監等著賞給一月錢糧

一上三旗辛者庫當差婦人著酌加賞賜

一罰贖積穀原以備賑冬月嚴寒鰥寡孤獨貧民無以爲生著直省各督撫令有司務將積穀酌量賑濟毋令奸民假冒支領

一各處效力贖罪人員向無定限多致苦累殊堪矜憫著各該管官查係已滿三年者聲明犯罪緣由奏請酌量寬免

於戲開國承家俾緝熙於純嘏行慶施惠用敷錫厥庶民布告天下咸使聞知

同治十一年

上諭御史袁承業奏考試弊竇多端請旨嚴禁一摺考試爲掄才大典功令森嚴豈容潛滋弊竇若如該御史所奏近年考試教習各項大半冒名代倩鄉會兩闈並殿廷考試各種弊端亦未盡絕實屬不成事體嗣後中外大小臣工凡與衡文之任者務各精白乃心嚴絕干謁其外簾各官亦應認真稽核力杜諸弊庶奔競者幸獲無由而真才不至掩蔽經此次訓誡之後倘仍敢玩法營私或被人參劾或別經發覺朝廷惟有執法嚴懲決不寬貸毋謂言之不預也

同治十一年

上諭御史吳鳳藻奏請整飭謄錄對讀積弊並請飭逐場校閱各摺片文闡謄錄對讀等官原爲除弊而設若如該御史所奏謄錄任意潦草對讀視爲具文此等弊端亟應嚴行整頓嗣後各直省監臨知貢舉務當飭令各執事官認真辦理有犯必懲至闈中校閱文藝本應三場並重不得專重第壹場此後中外臣工凡與衡文之任者務當逐場衡校冀拔真

才毋許草率從事用副朝廷籲求賢俊至意

同治十二年

皇帝詔曰朕履位以來十一載於茲矣追維踐阼之初藐躬
尙在沖幼神器至重懼弗克勝仰蒙

兩宮

皇太后俯念時事多艱允廷臣垂簾之請俾朕專心典學講
求立政本原欽惟

兩宮

皇太后宵旰勤勞躬理庶政簡親賢以佐治命將帥以專征
納諫求才仁民愛物十一年如一日用能振肅紀綱廓清疆
圉上副

皇考未竟之志下啟後嗣蒙業之庥

功德盛隆震耀今古實薄海臣民所共見茲復特頒

懿旨以朕春秋方富宜親總萬幾與中外臣工共求治理朕
自惟涼德夙夜益增祗懼顧念

皇考文宗顯皇帝付託之重海內臣庶望治之殷畀予仔肩
曷敢不力謹遵

慈命昭告

天

地

宗廟

社稷於同治十二年正月二十六日親裁大政繼自今兢兢
業業一日二日萬幾罔敢自暇自逸爾諸王貝勒內外大小
文武羣臣務各精白乃心殫忠盡職任勞任怨毋或推避民

生疾苦必以上聞朝廷德意期於下究庶政舉民安共成郵治無負

兩宮

皇太后訓勸之意以保我不不甚至爾軍民人等亦宜仰體朕心務本興行共享承平之福始和布令百度維新用沛恩綸光昭鉅典所有事宜開列於後

歷代帝王陵寢

先師孔子闕里應遣官致祭著察例舉行

一岳鎮四瀆廟宇該地方官查有棟椽傾損藻飾不完者隨時修葺以昭誠敬

一滿漢孝子順孫義夫節婦該管官細加諮訪確具事

實奏聞禮部照例旌表

一京外大小文武官員著各賞加一級

一在京文武官員現在議降議罰及以前有革職留任及降級罰俸之案悉予豁免

一各省民人有孤貧殘疾無人養贍者該地方官加意撫恤如無室廬棲處該地方官酌設棲流所以便棲處

一軍民年七十以上者許一丁侍養免其雜派差役

一各省要路橋梁間有損壞行人勞苦該督撫查明飭令地方官隨時修理

於戲太和翔洽俾萬姓胥匡以生大猷允升予一人膺受多福布告天下咸使聞知

同治十二年

皇帝詔曰朕惟化起宮庭盛治莫先於教孝禮經邦國上儀首重夫尊親矧以任姒之徽音克紹唐虞之隆軌普八紘而徧德闡澤覃敷合兆姓以同瞻彝章式洽欽惟

慈安端裕皇太后

萱闈篤祐

蘭殿凝庥

垂教育之深仁

著溫恭之令範

慈禧端佑皇太后

度昭金玉

德協珩璜

肅雝表壺掖之型

樂利溥寰區之福

疇咨庶政殫十一年宵旰之勤

底定中原啟億萬世靈長之祚茲者仰承

異命親攬乾綱秉

懿訓以綏猷遵

成謨而圖治用集僉同之議敬申歸美之誠爰晉

崇稱丕揚

大烈謹告

天

地

宗廟

社稷於同治十二年二月初九日率諸王貝勒文武羣臣恭

奉

冊

寶加上

慈安端裕皇太后徽號曰

慈安端裕康慶皇太后

慈禧端佑皇太后徽號曰

慈禧端佑康頤皇太后 珍冊翔華益煥星雲之瑞金甌鞏固

咸霑雨露之施茂典聿光湛恩宜沛所有事宜開列於後

一在內親王之福晉以下公之妻以上著加恩賜

一外藩蒙古諸王之福晉以下公之妻以上著加恩賜

一民公侯伯以下二品大臣以上命婦著加恩賜

一從前尚過公主格格之額駙照伊等品級著加恩賜

一從前恩詔後陞職加銜補官者悉照現在職銜給與

封典

一貢生監生在監肄業者免坐監一月

一天下之本農為重各府州縣衛果有勤於耕種務本

力作者地方官不時加獎以示鼓勵

一歷年軍興驛站甚屬勞苦著各省督撫加意撫卹

一吉林黑龍江官兵及各省綠旗官兵之出征調防在

他省者著該督撫將軍查明各該官兵家屬賞給一

月錢糧

一罰贖積穀原以備賑冬月嚴寒鰥寡孤獨貧民無以

為生者各直省督撫飭令有司務將積穀酌量賑濟

無任奸民侵冒支領

一太監等著賞給一月錢糧

一上三旗辛者庫當差婦人著酌議賞賜

於戲廣

聖慈而錫類願熙鴻號於無疆合臣庶以臚歡垂示燕怡於有永布告天下咸使聞知

同治十三年

上諭御史鄧承修奏請飭禁抽收圍姓賭款一摺據稱廣東省賭風甚熾每屆鄉試及歲科試期開場設局竟有巧立圍姓名目抽收經費等語賭博本干例禁况考試屆期尤應嚴行禁止若如該御史所奏藉端抽收款項實屬不成事體著瑞麟張兆棟卽行裁革出示嚴禁以肅政體而杜弊端

同治十三年

皇帝詔曰朕蒙

皇考文宗顯皇帝覆載隆恩付畀神器冲齡踐阼寅紹丕基臨御以來仰蒙兩宮

皇太后垂簾聽政宵旰憂勞嗣奉

懿旨命朕親裁大政仰維

列聖家法一以敬

天法

祖勤政愛民爲本自維薄德敢不朝乾夕惕惟日孜孜十餘年來稟承

慈訓勤求上理雖幸官軍所至粵捻各逆次第削平滇黔關隴苗匪回匪分別剿撫俱臻安靖而兵燹之餘吾民瘡痍未

復每一念及寤寐難安各直省遇有水旱偏災疆臣請蠲請賑無不立沛恩施深宮兢惕之懷當為中外臣民所共見朕體氣素強本年十一月適出天花加意調攝乃邇日以來元氣日虧以致彌留不起顧念統緒至重亟宜傳付得人茲欽奉兩宮

皇太后懿旨醇親王奕譞之子載湉著承繼

文宗顯皇帝為子入承大統為嗣皇帝特諭嗣皇帝仁孝聰明必能欽承付託

天生民而立之君使司牧之惟日矢憂勤惕厲於以知人安民永保我不丕基並孝養兩宮

皇太后仰慰

慈懷兼願中外文武臣僚共矢公忠各勤厥職用輔嗣皇帝

到隆之治則朕懷藉慰矣喪服仍依舊制二十七日而除布告天下咸使聞知

光緒元年

皇帝詔曰我大清篤承

天佑繼繼繩繩仰惟

太祖

太宗洪建丕基

世祖統一區夏

聖祖

世宗

高宗

仁宗

宣宗

文宗一德相承萬邦攸賴我

大行皇帝臨御天下十有三年惕厲憂勤孜孜求治上秉兩

宮

皇太后懿訓簡任親賢削平巨憝羣黎蒙福中外乂安方期

景祚延洪永膺多祐詎意

聖躬弗豫於同治十三年十二月初五日

龍馭遽升欽奉

遺詔祇遵兩宮

皇太后懿旨以朕承繼

文宗顯皇帝為子入承大統神器至重屬在藐躬朕自維沖

齡薄德懼弗克勝顧念

列聖詒謀之善

大行皇帝付託之隆勉抑哀衷恪遵

成命於正月二十日祇告

天

地

宗廟

社稷即皇帝位以本年為光緒元年仰紹

前徽冀臻上理所有事宜開列於左

一在京在外諸王以下至公等以上俱加恩賜

一內外自公主以下至格格各加恩賜

一內外滿漢文武大小官員俱加一級

一內外大小各官除各以現在品級已得封贈外凡升

級及改任者著照新銜封贈

一文官在京四品以上在外三品以上武官在京在外

二品以上照現任品級各廕一子入監讀書

一內外文職自四品以下武職自三品以下降革留任

及住俸罰俸處分准其開復

一會試額數俟禮部臨期奏明人數請旨酌量廣額鄉

試大省加三十名次省加二十名小省加十名滿洲

蒙古加六名漢軍加三名

一各直省入學額大學加七名中學加五名小學加三

名

一國子監貢監生及各官學教習免坐監一月

一各直省儒學無論府州縣衛俱於光緒元年以正貢

作恩貢次貢作歲貢

一每府州縣衛各舉孝廉方正暫賜以六品頂戴榮身

以備詔用務期採訪真確毋得濫舉

歷代帝王陵寢

孔子闕里及五嶽四瀆等祀應遣官致祭者照舊例行

一官吏兵民人等有犯除謀反叛逆子孫謀殺祖父母

父母內亂妻妾殺夫奴婢殺家長一家非死罪三人

採生折割人謀殺故殺真正死罪不赦外軍務獲罪

隱匿逃人亦不赦外其餘自光緒元年正月二十日

以前已發覺未發覺已結未結者咸赦除之有以赦

前事告訐者以其罪罪之

一各省軍流人犯查明到配三年實在安靜守法及年逾七十者釋放回籍

一各旗籍內務府及五旗包衣人等凡侵貪挪移一切賠罰應追銀兩實係本人家產盡絕者查明准予豁免其分賠代賠以及牽連著賠者一概豁免

一凡官員因公賠罰等項而其子孫又代祖父著賠者查明豁免

一旗營官兵有因出征及被災借支俸餉者免其扣還一滿漢兵丁有曾經効力行間因被傷年老閒住者除例得優卹外查明著加恩賚

一各直省有同堂五世及親見七代者除例賞扁額外查明著加恩賚

一天下之本農爲重各府州縣衛果有勤於耕種務本力作者地方官不時加獎以示鼓勵

一除五旗包衣佐領下披甲人等不賞外八旗滿洲蒙古漢軍披甲人礮手步軍各賞一月錢糧

一軍民年七十以上者許一丁侍養免其雜派差役八十以上者給與九品頂戴九十以上者給與八品頂戴百歲以上者給與七品頂戴一百二十歲以上者給與六品頂戴百歲至一百二十歲以上者均仍題明給與建坊銀兩

一各處養濟院所有鰥寡孤獨及殘疾無告之人有司留心以時養贍無致失所

於戲膺圖受籙難寬兢業之心揚烈觀光月懋顯庸之績諸

王文武大小臣工其矢爾公忠用弼予冲人以固我國家億萬年無疆之祚布告天下咸使聞知

光緒元年

皇帝詔曰自古帝王斟元建極錫羨延洪仁聲溥於四維德化垂於萬禩爰升彝而薦廟必崇諡以尊名昭皇煌帝諦之儀紀舜僭堯堯之美鴻明寶笈彪炳瑤編禮至隆也典至鉅也欽惟

大行皇帝

恭已猷升

撫辰道豫

乾行運夫至健

離照燭於無疆爰自

冲齡誕膺

寶命

堯門稟

訓式仰

成謨

軒陛延釐

恩推錫類祀

兩郊而璧琮秩禮奉

九廟而瓚彝升藪

社稷明禋懍祓齋於昕夕

橋山展謁深愜優於春秋

塵祁寒暑雨之咨思艱倍切

勵日就月將之學遜志彌勤誦

實錄而有翼有巖

求嘉謨而汝明汝聽矧復

盛彰九伐

武紹

十全

命節鉞以專征

授韜鈴而進討神機勁旅創百千組練之營

廟算宏謨勸十萬貔貅之眾於以北平河朔南靖江淮聲靈

遠訖乎西陲氛祲旋銷於東海

行圍禁苑士騰七萃之歡

閱射華林兵叶六師之吉熙春有謚函夏無塵溯自

大政親裁允矣

治功丕懋至旰忘食未明求衣

普恩膏而貸賦蠲租

念民依而省災肆赦凡十三年之

豐功偉烈

巍煥難名合億萬姓之蹈德詠仁揄揚莫罄朕恪遵

慈命寅紹

洪圖荷蒙

付託之深恩爰舉尊崇之鉅典謹命諸王貝勒文武羣臣敬

考彝章詳議

謚號百辟卿士僉言允符祇告

天

地

宗廟

社稷以光緒元年三月初三日敬奉

冊

寶恭上

大行皇帝

尊諡曰

繼天開運受中居正保大定功聖智誠孝信敏恭寬毅皇帝

廟號曰

穆宗盛典聿彰殊恩宜沛所有事宜開列於後

一嶽鎮海瀆廟宇傾頽者該地方官奏明修葺以致誠敬

一內外大小各官除各以現在品級已得封贈外著照

新銜封贈

一在京滿漢文武大小官員俱各加一級

一在京王公文武官員任內有革職留任及降級罰俸者咸與開復又在京官員現在議降議罰者悉行豁免

一外藩蒙古王公以下台吉以上有罰俸住俸者咸與開復其現在議罰者悉行豁免

一會試文武舉人已經中式者除過犯黜革外其餘殿試謄寫錯誤不合體式者禮兵二部察明覈實准其再行殿試

一鄉試已經中式文武舉人除過犯黜革外其有磨勘

原卷字句錯誤以致停科者俱著寬免准其會試

一滿漢孝子順孫義夫節婦該管官細加咨訪確具事

實奏聞禮部覈定以憑旌表

一各省道路橋梁間有損壞者著地方官查明修理以

利行旅

一各處養濟院所存鰥寡孤獨殘疾無告之人有司留

心以時養贍勿致失所

一現在內外監候質審及干連人等俱著准其保釋

一軍流人犯有本人身故其妻子情願回籍者該管官

報明該部准令各回原籍

於戲是訓是行永紹綿長之祚丕承丕顯宏開昌大之基布

告天下咸使聞知

蠲恤附

康熙二年豁免廣東遷移沿海田地無徵銀米

三十三年南海等三縣被災饑民動常平穀賑濟

三十四年豁免廣州府屬康熙二十三年以前積欠及帶徵

未完銀米

四十一年廣州府屬被災錢糧照分數豁免

四十三年廣州府屬被災錢糧照分數豁免

四十三年蠲免廣州府屬康熙四十三年以前未完地丁銀

米

五十一年蠲免廣州府屬五十年五十一年地丁錢糧歷年

舊欠一並免徵

五十二年三水等縣水災按口給穀賑濟

五十三年廣州府屬歉收動借倉穀俟來歲買補還倉
雍正四年南海等縣被災錢糧按分數豁免又動常平社倉
穀石按名賑濟

乾隆二十七年蠲免乾隆二十二年起至二十五年民欠錢糧

三十六年廣州府屬錢糧全行蠲免

四十五年廣州府屬錢糧全行蠲免

五十五年蠲免廣州府屬地丁錢糧分作三次按年輪免自

五十六年為始至五十八年止

六十年蠲免廣州府屬地丁錢糧又南海三水等縣被水淹
浸田畝緩征地丁正耗銀米并賞借口糧折銀等項所有未
完銀米全行豁免

嘉慶四年豁免廣州府屬乾隆六十年積欠地丁正耗銀米

二十四年豁免廣州府屬自嘉慶十五年至二十二年止未

完地丁及緩征帶征銀米

道光十五年豁免道光十年以前民欠錢糧

二十五年豁免道光二十年以前民欠錢糧

咸豐元年蠲免道光三十年以前民欠錢糧

七年清遠縣屬因連年被匪滋擾收成歉薄豁免咸豐六年
未完民欠錢糧

同治元年蠲免咸豐九年以前民欠錢糧

六年裁減廣州府屬每年征收色米價銀一十六萬五千四
百餘兩

十一年豁免同治六年以前民欠錢糧

番禺金錫齡分纂

番禺金佑基初校

番禺史悠履再校

番禺金俊基三校

番禺史悠泰四校

廣州府志卷五終

廣州府志

卷五

